

## 1 Corintios

<sup>1-2</sup> Høøch Pablo hädaa nocy cham njahby. Dióshøch xwyiinguejx coöchä Jesucristo xquiuguexyhádät. Mijts hädaa nocy cham nyajnjahby, pønjaty ja'a Diosmädi-a'agy mábøjp maa ja'a cajpt jadhñ xiøhatiän Corinto. Dios ja'a Jesucristo jadhñ quejx coo hajxy hoy xñäh-ho'túutäm, pønjaty ja'a Jesucristo miädia'agy mábøjcäp wiinduhmyhagajpt. Jaaya'ay hajxy nWiindsønhájtäm. Dios hajxy xyajnáhdíjjäm coo ja'a Jesucristo hajxy xñäh-ho'túutämät. Ja'a hermano Sóstenes, xyajpoo'xp mijts je'ebä. <sup>3</sup> Weenä Dios hoyhajt weenhajt hajxy xmio'oy møødä Jesucristo. Ja'a Dios hajxy nDeedyhájtäm.

<sup>4</sup> Homiänájøch ja'a Dios nnäma'ay Dioscujú'uyäp je'eguiøxpä coo Dios mayhajt tiuñ maa mijtsøxpän. Paadiä Dios mayhajt jadhñ tiuñ, coo Jesucristo hajxy tu'ugmädia'agy mmøødhity. <sup>5</sup> Coo hajxy jadhñ mmøødhity, paadiä Dios hajxy tøø xpiuhbety møj may, jadhñ hajxy hoy mgápxät, jadhñ hajxy hoy mwiinjuó'øwät cøxiä. <sup>6</sup> Coo højts mijts ja'a mädia'agy tøø nyajwiin-gapxø'øy coo Jesucristo hajxy xñähho'túutäm, paadiä Diosmädia'agy hajxy hamuumdu'joot mmäbøjnä. <sup>7</sup> Coo hajxy jadhñ mmäbøjnä hamuumdu'joot, paadiä Dios mäjaa hajxy xjiaançh tehñ mio'oy coo hajxy mgudiunñ waambaty hajxy xyhane'emy. Mjøbhijxyp mhajuøøbiä Jesucristo hajxy jadhñ coo quiädaactägatsa'añ. <sup>8</sup> Dios hajxy xpiuhbedaañb coo miädia'agy hajxy hoy mgudiúunät. Paady mijts Dios hänajty xpiäda'aga'añ hawa'adstuum coo ja'a Jesucristo ja'a haxøøgjäya'ay hänajty yajcumä-dowaannä. <sup>9</sup> Tøyhajt ja'a Dios miädia'agy jadhñ. Cabä Dios mänaa yhøhnda'agy. Jaaya'ay hajxy tøø xyajnáhdijy

coo yHuung hajxy mmøødhjítät tu'ugmädia'agy. Ja'a Jesucristo je'e.

<sup>10</sup> Hermanodøjc, ja'a Jesucristo miädiá'agyhøch mijts cham nyajmøødcapx nyajmøødmädiaactägatsaamby coo hajxy tu'ugjoot tu'ugwiinmahñdy mhídät maa tsajtøjcän. Cab hajxy tii myajtsibó'øwät. <sup>11</sup> Páadyhøch jaduhñ nmána'añ, tøøchä hermanohajxy xyajmädoxyaty coog hajxy mnimiädsibø'øyii. Jim hajxy chooñ maa Cloé tiøjcän. <sup>12</sup> Wiingátiägä mädia'agy hajxy mbanøcxy. Näje'e hajxy miäna'añ cóogøch høøch nmädia'agy hajxy xpianøcxä. Näje'e hajxy miänaambä coogä Apolos miädia'agy hajxy pianøcxä. Näje'e hajxy miänaambä coogä Pedro miädia'agy hajxy pianøcxä. Y näje'e hajxy miänáangombä coogä Jesucristo miädia'agy hajxy pianøcxä. <sup>13</sup> Pero cabä Jesucristo miädia'agy hajxy madiu'uxyajnähixøyyäm. Hix, jaaya'ay mijts jaduhñ xñäho'tuut cruzcøxp, ca'a yhøøch mijts nnäho'tuut. Paady hajxy mnäbejty coo Jesucristo miädia'agy hajxy mbanøcxä, ca'a jie'eguiøxpä cooçh høøch nmädia'agy hajxy xpianøcxä. <sup>14-15</sup> Jagóoyyøch ja'a craa Crispo nyajnäbejty maa mijtsän møødá craa Gayo. Cábøchä wiinghäna'c jim nnä'ä yajnäbejty. Cab hajxy jaduhñ mmäná'anät cooc xtyijy nyajnäbejty. Páadyhøchä Dios jaduhñ nnäma'ay Dioscujú'uyäp. <sup>16</sup> (Jexioo, chamçh njahmiejtstáacombä cooçhä Estéfanashajxy nyajnäbejpä, møødá yhuung møødá tio'oxy. Cab ndijy wiinghäna'c njaac yajnäbejty.) <sup>17</sup> Ca'a jiäya'ay-yajnäbéjpøch Jesucristo xquiejxy. Diosmädia'agy-yajwá'xpøch xquiejxy coo hajxy xñäho'túutäm cruzcøxp. Cooçh jaduhñ nwädity Diosmädia'agy-yajwa'xpä, howyiinjuøøñøch hänäjty ngapxy nmädia'agy. Páadyhøch jaduhñ ngapxy nmädia'agy howyiinjuøøñä, chójpiøch njoot jaduhñ coo hajxy hoy mwiinjuó'øwät ja'a Jesucristocøxpä. Cábøch njoot chocy cooçh

nmädia'agy hajxy xquiumáayyät je'eguiøxpä cóogøch ty-  
iyy yajxon̄ ngapxy nmädia'agy.

<sup>18</sup> Nmäbøjcäm ja'a mädia'agy hajxy jaduħn̄ coo Je-  
sucristo hajxy xñähho'túutäm cruzcøxp. Pønjaty hä-  
da'agaamb̄ møjcu'uhaam, coo hajxy miädoy coo Jesu-  
cristo hajxy tøø xñähho'túutäm cruzcøxp, ñäxiicypy ha-  
jxy jaduħn̄ je'eguiøxpä cooc tyiyy jagooyyã cädieeyhä-  
na'c-hajxy yagho'ogyii cruzcøxp. <sup>19</sup> Jaduħn̄ jim̄ myiñ̄  
cujaay maa Diosmädia'aguiän:

Ja'a häna'c-hajxy cuwiinmahñdypä, ja'a tyiyy hajxy  
howyiinmahñdymødpä, cábøçhä wyiinmahñdy-  
hajxy nyajtsoobaadaanä,

nømä Dios miänaañ. <sup>20</sup> Hoorã, yajcähxø'piã Dios coo  
jäya'ay wyiinmahñdyhajxy quia'a tsoobaada'añ, ja'a ha-  
jxy niñänøømäbã cuwiinmahñdy, ja'a tyiyy hajxy howyi-  
inmahñdymødpä. Ñäxiicypiã Dios jaduħn̄. <sup>21</sup> Jaançh̄  
teh̄m̄ quiuwiinmahñdiã Dios tu'uquiã. Je'e jaduħn̄ mä-  
naañ coo højts ja'a miädia'agy nyajwã'xãmät coo Jesu-  
cristo hajxy xñähho'túutäm. Pønjaty jaduħn̄ mäbøjp,  
Dios jaduħn̄ wiinmahñdyhajt coo hajxy jaduħn̄ yajnäh-  
wa'adsøjät ja'a piojpã quiädieeyhajxy, hoyyã jäya'ay-  
hajxy näje'e jia näxi'igy. Ca'a yhøjts nhamdsoo wiin-  
mahñdyhaam ja'a Dios ja'a miädia'agy hajxy xyajwiin-  
juøyyãm. Jaduħnã Dios miänaañ.

<sup>22</sup> Ja'a judíoshajxy, coogã hoy-yagjuøøñäbã hajxy  
yhíxät, mänítac tyiyy hajxy jaduħn̄ miäbøga'añ. Y  
ja'a griegohajxy, mänítac tyiyy hajxy jaduħn̄ miäbø-  
ga'añ coogã jäya'ay miädia'agy hajxy miädóowät, ja'a  
hajxy niñänøømäbã cuwiinmahñdy, ja'a tyiyy hajxy  
howyiinmahñdymødpä. <sup>23</sup> Pero højtshájtäm, jaduħn̄  
højts nmädiácäm coo Jesucristo hajxy xñähho'túutäm  
cruzcøxp. Cabã judíoshajxy jaduħn̄ miäbøcy. Cab ha-  
jxy jaduħn̄ miäna'añ cooc tyiyy Jesucristo quia'a Dioshu-

ungä. Hiḡ, nōm hajxy miäna'añ cooc tyijy ja'a Dioshu-  
 ung quia'a ho'oga'añ cruzcøxp. Hoorä, ja'a jäya'ayhajxy  
 ca'a judíospä, ni je'e hajxy quia'a mäbøjpä. Hoñäxiicnä  
 Diosmädia'agy hajxy miädoy. <sup>24</sup> Pero coo Dios hajxy tøø  
 xwyiimbíiwäm, paady hajxy nmäbøjcäm coo Jesucristo  
 hajxy xñähho'túutäm, hoy hajxy nja judíosäm. Cooc hajxy  
 jaduñ xñähho'túutäm, jaduñä Dios yajcähxø'cy coo  
 mäjaa miøødä, coo quiuwiinmahñdiä. <sup>25</sup> Cooc Dios ja'a  
 yHuung ñähdujcy coo yagho'ogøøjät, paadiä jäya'ayhajxy  
 näje'e miäna'añ cooc tyijy Dios quia'a cuwiinmahñdiä,  
 cooc tyijy mäjaa quia'a møødä. Cabä Diosmädia'agy  
 hajxy miäbøcy, paady hajxy jaduñ miäna'añ. Hoyyä  
 Dios ja'a wiinmahñdy häxøpy weeñtiä jia møødä, ni  
 jaduñä jäya'ay wyiinmahñdyhajxy häxøpy quia'a na-  
 jtspaadøyyä. Jaanä jaduñduhmbä, hoyyä Dios ja'a  
 mäjaa häxøpy weeñtiä jia møødä, ni jaduñä jäya'ay  
 miäjaahajxy häxøpy quia'a najtspaadøyyä.

<sup>26</sup> Hermanodøjc, huuc mäadow hajxy, mänaa mijts  
 Dios xwyiimbiiyyän, cab hajxy hānajty nāmāy mhøx-  
 pøquiä, näjé'eyyäm; cab hajxy hānajty nāmāy mmäyøøjä,  
 näjé'eyyäm; cabä møjcuħdujt hajxy hānajty nāmāy  
 mmøødä, näjé'eyyäm. <sup>27-28</sup> Nmäbøjcäm ja'a Diosmädi-  
 a'agy hajxy. Xpiéjxäm jäya'ay hajxy hijty coo hajxy hijty  
 nga'a høxpøquiäm, coo hajxy hijty nga'a mäyøøjäm, coo  
 møjcuħdujt hajxy hijty nga'a møødhajtäm. Xxiøøghajtäm  
 ja'a jäya'ay hajxy hijty jaduñ. Pero coo Dios hajxy xwyi-  
 imbíiwäm, jaduñä Dios ja'a jäya'ay yajtsähdiuundägajch,  
 ja'a hajxy hijty xpiéjxämbä. Jaduñä Dios yajcähxø'cy  
 coo hajxy hānajty tøyhajt quia'a høxpøquiä, coo hajxy  
 hānajty tøyhajt quia'a mäyøøjä, coo møjcuħdujt hajxy  
 hānajty tøyhajt quia'a møødä. <sup>29</sup> Hiḡ, cab jaduñ pøn jim  
 ñiguiumayáañänä Dioswiinduum. <sup>30</sup> Dios hajxy jaduñ  
 xpiädäacäm tu'ugmädia'agy møødä Jesucristo. Jaduñä

Dios yajcähxø'cy coo quiuwiinmahñdiä coo Jesucristo yaa quiejxy hädaa yaabä naaxwiin, coo hajxy hoy xñäh-ho'túutäm. Jaduhñ hajxy xyajnáhwáatsäm ja'a nbojpä ngädieeyháltäm. Jaduhñ hajxy xpiädáacäm hawa'ad-stuum. <sup>31</sup> Jaduhñä Diosmädia'agy miäna'añ: “Cab hajxy hamdsoo nniguiumáayyämät. Tsögä Dios hajxy mõj jaançh pädáacäm.”

## 2

<sup>1</sup> Hermanodøjc, mänáajøch mijts nnähooçhooñän, mänáajøch mijts ja'a Diosmädia'agy nyajwiin-gapxøøçhooñän, cab mijts yajxón nmøødmädiaacy.

<sup>2</sup> Cooçh hänajty jim nnøcxa'añ maa mijtsän, tøøch hänajty nwiinmahñdyhaty coo Jesucristo hajxy hänajty nyajmøødmädia'aga'añ, coo hajxy hänajty je'e tøø xñähho'túutäm cruzcøxp. Cábøch wiingmädia'agy hänajty nmädia'aga'añ. <sup>3</sup> Nnajuøøbiøch hänajty cooçh hänajty hoy nga'a capxa'añ ja'a nhamdsoo copc-háamhøch. Høxtä tsähgøøbiøch hänajty; høxtä tsäyúubiøch hänajty. <sup>4</sup> Hóyhøch hänajty yajxón nga'a jagä mädia'agy, xpiuhbéjpøch ja'a Dioshespíritu hänajty ja'a miäjaahaam neby hajxy jaduhñ ca'xy mwiinjuó'øwät.

<sup>5</sup> Hiç, chojpiä Dios ja'a jioot jaduhñ coo miädia'agy hajxy mmábøjcät. Ja'a miäjaahaamä Dios hajxy xyajmábøcy, ca'a quiuwiinmahñdyhäna'c hajxy jaduhñ xyajmábøjp.

<sup>6-7</sup> Ja'a häna'c-hajxy cuwiinmahñdypä hädaa yaabä naaxwiimbä, cábøch hajxy jaduhñ xñänømy cooçh nguwiinmahñdiä. Jaduhñhøch häna'c-hajxy xñänømbä cooçh nga'a cuwiinmahñdiä, ja'a mõjcuhdujtmøødpähajxy ja'a hädaa yaabä naaxwiimbä, ja'a Diosmädia'agy hajxy ca'a mábøjpä. Mänitä miäjaahajxy piøgáanäxä møødä wyiinmahñdyhajxy coo hädaa yaabä naaxwiimbä hänajty quiuhdägoyya'añ.

Pønjatiä Diosmädia'agy ca'xy cudiuumb, ñajuøøby hajxy jaduñ coo Dios tøyhajt quiuwiinmahñdiä. Paady hajxy jaduñ ñajuø'øy cooçh jaduñ tøø nyajmøødmädia'agy coo Jesucristo hajxy tøø xñähho'túutäm, møød coo hajxy jim nnøcxäänäm Dioswiinduum. Jequiän ja'a Dios jaduñ wyiinmaayy. Cahnä naaxwiimbä hänajty yhawijy tiøø'xta'agy. Cabä Dios ja'a wyiinmahñdy choj yajwiingähxø'cy. Cahnä hajxy xyajwiinjuøøyyäm høxtä jäda'anäbaadyñä. <sup>8</sup> Pero cabä møjcuħdujtmøødpähajxy jaduñ wyiinjuø'øwa'añ. Coö hajxy cu wyiinjuøøyy, cabä Jesucristo hajxy cu miøjpahbejty cruzcøxp. Piädaac ja'a Dios ja'a yHuung jaduñ coo yaa wyiingudsähgø'øwøøjät hädaa yaabä naaxwiin. <sup>9</sup> Jaduhñä Diosmädia'agy miäna'añ:

Ni pøn quia'a hixyñä, ni quia'a mädoynä,  
ni quia'a wiinmayñä nebiatiä Dios hoyhajt weenhajt  
mio'owa'añ pøn jaduñ chojpy.

<sup>10</sup> Ja'a højtshájtäm, tøø Dios hajxy xyajwiinjuøøyyäm ja'a yhEspírituhaam nebiaty jaduñ wyiinmahñdyhajty. Yhøxtaabiä yhEspíritu jaduñ neby hajxy hoy xyajwiinjuøøyyämät.

<sup>11</sup> Cabä wiinghäna'c jaduñ xñajuøøyyät nebiaty hänajty mwiinmay. Jagooyyä miich mhamdsoo juøhñdy jaduñ ñajuø'øwät. Jaanä jaduñä Diospä, cab jaduñ pøn ñajuøøbiä nebiatiä Dios wyiinmay. Jagooyyä Dios yhamdsoo Espíritu jaduñ ñajuø'øy. <sup>12</sup> Tøø Dios ja'a yhEspíritu hajxy xmióoyyäm coo højts ja'a miädia'agy jaduñ nmäbøjcäm. Ja'a yaabä juøhñdy, cab jaduñ miäbaady nebiä Dios ja'a yhEspíritän. Paady hajxy jaduñ xmióoyyäm, jaduñ hajxy xyajnajuøøyyäm coo hoyhajt weenhajt hajxy xñä'ä móoyyäm. <sup>13</sup> Jaduhñä jäya'ay hajxy nhawaandägájtäm coo hajxy jaduñ xñä'ä móoyyäm. Jaduhñ hajxy nhawaañäm nebiatiä Dioshespíritu hajxy

xyajwiinjuøyyäm. Jadhun hajxy nyajwiinjuøødiägäjt-säm je'eguiøxpä coo Dioshespíritu hajxy miøødhajpä. Ja'a häna'c-hajxy tyjy cuwiinmahñdypä, cabä wiinmahñdy hajxy ca'xy miøødä coo tijaty mädia'agy hajxy hänajty xyajmøødmädia'aga'añ. Paadiä wiinmahñdy hajxy ca'xy quia'a møødä coo Dioshespíritu hajxy quia'a møødä. Pero hõjts, cab hõjts nmädiáacäm ja'a nhamdsoo wiinmahñdyhaam.

<sup>14</sup> Põnjatiä Dioshespíritu ca'a møød, cab hajxy wyiinjuø'øy nebiatiä Dioshespíritu hajxy jia wi'i yajmøødmädia'aga'añii. Cábäc tyjy jadhun choobaady. Hiç, coo Dioshespíritu hänajty mga'a møødä, cab jadhun mnä'ägädä wiinjuø'øwät nebiä Dioswiinmahñdy. <sup>15</sup> Põnjatiä Dioshespíritu møød, quiøxy wiinjuøøby hajxy jadhun. Põnä Dioshespíritu ca'a møød, cabä cuhdujt hajxy miøødä coo hajxy miäná'anät cooc tyjy jäya'ay ja'a Diosmädia'agy hajxy hoy quia'a yajnähiç'øy, ja'a jäya'ay ja'a Dioshespíritu hajxy møødpä. <sup>16</sup> Jadhun jim myiñ cujaay maa Diosmädia'aguiän: “Cabä Dios wyiinmahñdy põñ ñajuøyyä. Cabä Dios põñ yajnähiç'øyii.” Pero nmøødhájtäm ja'a Jesucristo wyiinmahñdy hajxy jadhun.

### 3

<sup>1-2</sup> Hermanodøjc, cooçh jim nhooçhohñ maa mijtsän, cábøch mijts tsipjaty nyajnähiçøyy. Ja'a ca'a tsipjátypøch mijts jadhun nyajnähiçøyy. Hiç, je'enä hajxy hänajty mhityñä nebiä naamdägo'øybän maa Jesucristocøxpän. Jadhun hajxy hänajty mhity nebiä Diosmädia'agy ca'a mæbøjpän. Cahnä hajxy hänajty may mwiinjuø'øyñä maa Dioshespíritucøxpän. Y høxtä jäda'anäbaadyñä, cahnä hajxy jadhun may mwiinjuø'øyñä. <sup>3</sup> Je'enä hajxy mniwyiinhecy mniwyiindoyiinä coo hajxy mga'a hity tu'ugmädia'agy. Cab hajxy jadhun mniçhocy

mnimiee'xyii. Je'enä hajxy jaduñ mjäya'ayhaty nebiä Diosmädia'agy ca'a mäbøjpän. <sup>4</sup> Näje'e hajxy mmäna'añ: “Høøch ja'a Pablo miädia'agy nbanócxäp.” Näje'e hajxy mmänaambä: “Høøch ja'a Apolos miädia'agy nbanócxäp.” Coö hajxy jaduñ mga'a hity tu'ugmädia'agy, cähxø'p jaduñ coö hajxy jaduñ mjäya'ayhatyñä nebiä Diosmädia'agy ca'a mäbøjpän.

<sup>5</sup> Høøch Pablo, cábøch møjcuñdujt nmøødä. Ni ja'a Apolos jaduñ quiaa móødäbä. Cab jaduñ yhäxixø'oy coö højts nmädia'agy hajxy jaduñ xyajtsibøyyät. Jue'e højts, Dios højts jaduñ xñä'a moonsähajp. Dios højts jaduñ xquiejx coö mijts jaduñ nyajñähixø'owät. Jaduñ hajxy mmäbøjcy ja'a Dioscøxpä. Cøjwiinduum højts ja'a Dios ja'a tuuñg xmiooyy. <sup>6</sup> Høøch mijts ja'a Diosmädia'agy nyajñähixøøchøn. Mänitä Apolos hajxy jaduñ xjiaac yajñähixøoyy. Pero Dios, je'e mijts jaduñ xyajmäbøjc. Y tehñgahnä hajxy xjiaac yajmäbøga'añ. Tehñgahnä hajxy xjiaac yajmayø'owa'añ. <sup>7</sup> Høøch Pablo, cábøch møjcuñdujt nmøødä. Ni ja'a Apolos jaduñ quia'a móødäbä. Jagooyyä Dios møjcuñdujt miøødä. Je'eduhñ tu'ug xyajmäbøgäp. Je'eduhñ tu'ug xyajmayø'owäp. <sup>8</sup> Tu'ugmädiá'agyhøch ja'a Apolos nmøødhity, hoy højts cøjwiingtuuñg nja møødä. Coö højts hoy ndúnät, mänitä Dios møjmayhajt tiúnät maa højtscøxpän. Pero coö højts hamuumdu'joot nga'a túnät, mänitä Dios mayhajt hänäjty weeñtiä tiunaambä maa højtscøxpän. <sup>9</sup> Højts ja'a Dios nmøødtuumby. Y coö mijts hoy mjäya'ayhaty, jaduñä jäya'ay tøyhajt hajxy miøødä coö Dios hajxy hoy xyagjäya'ayhaty. Mijts ja'a Dios ja'a mwiinmahñdy xyajtägäjtšäp neby hajxy jaduñ mhídät nebiatiä jioot chocy.

<sup>10-11</sup> Tøøchä Dios xwyiinguexy coö mijts ja'a miädi-a'agy nyajñähixøoyyät ja'a Jesucristocøxpä. Xmióoyy-



höchä wiinmahñdy jaduñ nebiöch mijts jaduñ hoy nya-  
jnähixø'ød. Cabä cuhdujt jaduñ myiñ coo pøn ja'a Dios  
miädia'agy yajtägátsät ja'a Jesucristocøxpä. Ween ha-  
jxy jaduñ yajnähixøøbiä nébiöch tøø nyajnähixø'øyän.

<sup>12</sup> Pønjatiä Diosmädia'agy mäbøjp, jaduñ hajxy tiu-  
unghaty nebiä jäya'ayhajxy jaduñ miädoyhädät ja'a  
Jesucristocøxpä. Näje'e hermanodøjc-hajxy hoy tiuñ.

Paady hajxy jiaanč tehñ quiumayii. Jiiby hajxy näje'e,  
cab hajxy hoy tiuñ. Paady hajxy jaduñ quia'a cumayii.

<sup>13-14</sup> Coo Jesucristo hänajty yaa quiädaactägatsa'añ, mänit  
jaduñ quiähxø'øga'añ pønjaty hänajty hoy tøø tiuñ.

Cøjxta'axiøø ja'a Dios jiahmiedsa'añ neby hajxy hänaj-  
ty hoy tøø tiuñäbä. Møjmayhajt ja'a Dios tiunaambä  
maa häna'c hoy tøø tiuñän. Jaduñ je'e quiähxø'ø-

gaambä pønjaty hänajty hoy tøø quia'a tuñ. Cabä Dios  
mayhajt tiuna'añ maa häna'c hoy tøø quia'a tuiñän.

<sup>15</sup> Hawa'adstuum hajxy yaghida'añii, pero hobiä nejpiä.

<sup>16</sup> Jaduñ hajxy nmäbáatäm hädaa hajxy  
njoothájtämbä nebiä Diostøjcän coo Dioshespíritu hajxy  
nmøødhájtäm maa hädaa njoodootyhajxiän. Mnajuøøby

hajxy jaduñ, túhmäts. <sup>17</sup> Pønjaty haxøøg nä'ägädä  
jäya'ayhajp, hoyyä Dioshespíritu hajxy jia møødä  
jioodooty, päda'agáanäp hajxy hajøøxc. Hix, coo ja'a

Dioshespíritu hajxy mmøødä ja'a mjoodooty, páadiäts  
mjoot hajxy wa'ads myaghídät. Hix, cabä Dioshespíritu  
hoñä'a maajä yhida'añ majaty hänajty quia'a wa'adsä.

<sup>18-19</sup> Näje'eg tyijy mijts madiu'u mnajuø'øy neby hädaa  
yaabä naaxwiimbä wiinmahñdy myiñ. Cab hajxy hamd-  
soo mniguiumayøød coo hajxy mjaty coo hajxy mna-  
juø'øy. Nømä Dios miäna'añ cooc hädaa yaabä naaxwi-  
imbä wiinmahñdy quia'a tsoobaady. Hahixøøby jaduñ  
coo mhamdsoo wiinmahñdy hajxy mnajtshixøøñät, coo  
hajxy jaduñ mnibiäda'agøøjät nebiä ca'a wiinjuøøbiän.

Jaduhñ ja'a Dioswiinmahñdy hajxy hoy mwiinjuó'owät nebiä tiöyyän. Jaduhñ jim myiñ cujaay maa Diosmädia'aguiän: "Dios yajcumädo<sup>w</sup>aamb ja'a häna'c jaançh tehñ jiajpä mäwiinhøøn." <sup>20</sup> Jaduhñ jim myiimbä cujaay maa Diosmädia'aguiän: "Ñajuøøbiä Dios coo jäya'ay wyiinmahñdyhajxy quia'a tsoobaady, ja'a hajxy tyijpiä cuwiinmahñdy." <sup>21-22</sup> Näje'e jäya'ayhajxy ñiguiumayii je'eguiøxpä coo jäya'ay miädia'agy hajxy pianøcxä ja'a tyijy tøyhajtmøødpä. Cab hajxy jaduhñ mbahíxät. Mijtsøxpä Dios cøxiä yhädiuuñ tijaty yaa hijp hädaa yaabä naaxwiin. Møød højts ja'a Dios jaduhñ xyhädiuumbä ja'a mijtsøxpä, højts yajnahixøøbiädøjc, møød høøch, møødä Apolos, møødä Pedro. Paadiä Dios jugyhajt hajxy xmióoyyäm neby hajxy jaduhñ hoy nyajtuung-paatämät. Hoy hajxy cu nja hó'cäm, hoy hajxy nyajtuung-paadäänäm tijaty jäda'ahaty jájtäp túunäp, chaads tijaty jadaanäp tunäänäp, je'eguiøxpä coo Diosmädia'agy hajxy nbanøcxäm. <sup>23</sup> Hix, coo Jesucristo hajxy mWiindsønhaty, paadiä miädia'agy hajxy myajtuunä. Y jaduhñä Jesucristobä, yajtuunäbä Tieedy miädia'agy je'ebä.

#### 4

<sup>1</sup> Cab højts møjcuhtujt jaduhñ nmøødä, ni høøch ni Apolos; xñä'ä moonsähajp højts ja'a Jesucristo jaduhñ. Dios højts jaduhñ tøø xwyiinguexy coo højts ja'a Diosmädia'agy ca'xy ngapxtówät, mädyijjaty ja'a jäya'ayhajxy hijty jegyhajty quia'a wiinjuøøby. <sup>2</sup> Mäduhñtiä jäya'ay mioonsähadyii, tsipcøxp hajxy quiudiúnät neby hajxy yhane'emyii. Paady højts jaduhñ ngudiunaambä neby højts ja'a Dios tøø xwyiinguexy. <sup>3-4</sup> Pero høøch, cábøch jaduhñ tii nmøjpdä'agy cooçh pøn waambaty xñänómät pø hóyhøch nyajnahixø'øy, pø caj. Hóyhøch cu nja mäna'an cooçh hoy nyajnahixø'øy, cab jaduhñ

choobaada'añ. Tu'uquiä Jesucristo jaduñ ñajuø'øy pø hóyhøch njaančh yajñähixø'øy. Y høøch, cooçh hamdsoo nniñänømøjät pø hóyhøch nyajñähixø'øy, pø caj, cábøch nmädia'agy jaduñ choobaadät. Cáboch nñajuø'øy pø hóyhøch tøø nyajñähixø'øy, pø caj. Pero, cab jaduñ ñejpiä pø nñajuøøbiøch, pø cáboch nñajuø'øy. Ja'a Jesucristo tu'uquiä nägapxaamb pø hóyhøch tøø nyajñähixø'øy, pø caj. <sup>5</sup> Caj pøn nä'ä nägoobä mnä'ä nänómät coo tøø quiädieey pø cabä tøyhajt hñajty mnä'ä møødä. Coo Jesucristo yaa quiädaactägätsät, mänit hñajty jaduñ yajcähxø'øga'añ neby hajxy nwiinmahñdyhajtäm, nebiaty hajxy hñajty hamee'ch tøø njäya'ayhajtäm. Mänitä Dios hajxy xquiumayáañäm coo hajxy hñajty hoy tøø ngudiúuñäm.

<sup>6</sup> Páadyhøch cham tøø nmädia'agy ja'a høøchcøxpä møødä Apoloscøxpä neby højts nyajñähixø'øy, cáboch njoot jaduñ chocy coo hajxy jaduñ mnänómät coo tu'jäya'ay jiaty, coo tu'jäya'ay quia'a jaty. Pønñatiä Diosmädia'agy yajñähixøøby, je'eçh jaduñ nnänøømby coo hajxy jaduñ mga'a nänómät. <sup>7</sup> Cab jaduñ yhooyä coo hajxy mniguiumayøjät. Hiç, Dios mäjaa hajxy jaduñ xmiooby neby hajxy jaduñ hoy mmädúnät. Cab jaduñ yhooyä coo hajxy mmäná'anät coo hajxy hamdsoohaamby mbaady. Caj mijts pøn xñänømy cooc tyijy mijts mjaančh tehñ miøj mjaančh tehñ jiaančhä.

<sup>8</sup> Nøñ mijtsäda'a hamdsoo mniñänømyii cooc tyijy Jesucristo mmäbaatnä nej yhojiäya'ayhatiän, y cooc tyijy ja'a Diosmäjaa hajxy mjaančh tehñ miøødä. Jaduñ mäwiin mijts mnibiädáacänä nebiä jäya'ayhajxy hanehmbän, cooc tyijy mijts cuhdujt mmaas møødä que højts. Pero mgapxtägooby hajxy jaduñ. Hoy hijty jaduñ coo hajxy cu mhanehmy. Näguipxy hajxy jaduñ cu nhanéhñäm. <sup>9</sup> Pero højts Diosquexypä,

jaduhñ mäwíinhøch ndijy hõjts Dios xpiádaacy nebiä cuhdujtmøød ca'a hidaambän. Jaduhñ mäwiin hõjts xpiádaacpä nebiä cádieeyhána'c yagho'oga'añiijän. Hijxwiinduum hõjts jaduhñ njaanč tehñ chaačhpøcy. Ja'a Diosmoonsähajxy tsajpootypä, je'e hõjts jaduhñ xyhijxp, møødä jäya'ayhajxy hädaa yaabä naaxwiimbä. <sup>10</sup> Nømä jäya'ayhajxy miäna'añ cooc tyijy hõjts tii nga'a jaty nga'a najuø'øy. Paady hõjts jaduhñ xñänømy coo hõjts ja'a Jesucristo miädia'agy nyajwa'xä. Pero mijts, mjaanč tehñ ñiguiumáayyöp hajxy jaduhñ cooc tyijy mijts ja'a Dios xjiaanč tehñ yajwiinjuø'øy ja'a Jesucristocøxpä. Jaduhñ hõjts jäya'ayhajxy xñänøombä cooc tyijy hõjts Diosmäjaa nga'a møødä. Pero mijts, mjaanč tehñ miøød ja'a Diosmäjaa tyijy. Mijts ja'a jäya'ayhajxy xñä'ägä wiingudsähgøøby. Pero hõjts jäya'ay xjiaanč tehñ piejxp xjiaanč tehñ tiehmb cooc tyijy hõjts tii nga'a jaty nga'a najuø'øy. <sup>11</sup> Jaguiay jayhu'ugy hõjts naxy nhity homiänaaxøøjä. Hagøødsø'øy hõjts nwit nducxy naxy nmäwädity. Xjiaanč tehñ chaačhtiuumb hõjts jäya'ayhajxy yaa homiänaaxøøjä. Cab hõjts tsänaadiaact maa tøø nmøødhaty ni mänaa. <sup>12</sup> Hamdsoo cø'øhaam hamdsoo tecyhaam hõjts nduñ nxajy. Jaduhñ hõjts nnägaayyøøc nbaady. Cooc hõjts jäya'ay naxy xñänømy haxøøgjaty, cab hõjts ndsippäda'agy nma'adpäda'agy. Yajxón hõjts nhadsoy. Cooc hõjts jäya'ay naxy xyajtsaačhpøcy, nmee'xtujpy hõjts jaduhñ. Cab hõjts waamb jaduhñ nnä'ägädä mäna'añ. <sup>13</sup> Cooc hõjts jäya'ay naxy xñähwaambety nä'ä nägoobä, mee'xxieemy hõjts jaduhñ njaanč tehñ yhadsoy. Høxtä jäda'anäbaadyñä hõjts jäya'ay xyhixy nebiä hujs nebiä haayän.

<sup>14</sup> Hermanodøjc, jaduhñhøch mijts njuøøñä nebiä hamdsoo huungän. Páadyhøch mijts jaduhñ nmägapxy

nhane'emy. Cábøch mijts jaduhñ nyajtsähdiuna'añ. <sup>15</sup> Hoy mijts häna'c xjia yajnähið'øý nämay ja'a Jesucristocøxpä, høøch mijts jaduhñ tu'uquiä xtieedyhajp ja'a Jesucristocøxpä, je'eguiøxpä cooçh mijts jayøbajt nya-jnähiðøøyy coo Jesucristo hajxy tøø xñähho'túutäm, y coo jadähooc jiuypiojtägajch. <sup>16</sup> Jadúhñhøch mijts nja näma'ay cooçh hajxy jaduhñ xpiahíxät.

<sup>17</sup> Y ja'a Timoteo, jadúhñhøch je'e ndsocy nébiøch nhamdsoo huungän ja'a Jesucristocøxpä. Pedyii jaduhñ jiaançh tehñ quiudiuñ ja'a Diosmädia'agy. Páadyhøch jim tøø nguexy maa mijtsän nébiøch mijts jaduhñ xjiah-miejtstä'agät cooçhä Jesucristo nbanøcxy. Wiinduhmy-hagájpthøçhä Jesucristo miädia'agy nyajwiingapxøøyyä maa tsajtøjcän. <sup>18-19</sup> Høøch, mobädájpøch jim nnøcx-aambä maa mijtsän coo Dios jaduhñ miäná'anät. Cabä jäya'ayhajxy näje'e miäbøcy cooc tyjy jaduhñ jim nga'a nøcxa'añ, je'eguiøxpä cooc tyjy njaançh tehñ chähgø'øý. Paady hajxy jiaançh tehñ ñiguiumayii. Howiaambaty hajxy jiaançh tehñ miäna'añ. Pero cooçh jim jaduhñ njaançh nøcxät maa mijtsän, mänitøch jaduhñ jim nhixa'añ pø jaançh tøyhajt ja'a Diosmäjaa hajxy jiaançh møødä, ja'a hajxy jaduhñ niguiumáayyäbä. Paady hajxy ñiguiumayii cooc tyjy ja'a Diosmäjaa hajxy jiaançh tehñ miøødä. <sup>20</sup> Je'e jaduhñ jaançh tehñ choobaatp coo Diosmädia'agy hajxy hoy mgudiúnät. Cab jaduhñ choobaady coo hajxy nä'ä nägoobä mnä'ä xi'ig mnä'ä mädiá'agät. <sup>21</sup> Nøcxáambøch jim maa mijtsän. Coo mhaxøøgcuhdujt hajxy mnajtshixó'øwät, mänitøch hajxy hoy yajxon nmøødmädiá'agät. Pero pø cabä mhaxøøgcuhdujt hajxy nnajtshixø'øwa'añ, nmøødhøch cuhdujt jaduhñ coo hajxy nyajcumädówät.

## 5

<sup>1</sup> Tøøch nmädoyhaty coo tul'jäya'ay haxøøg jiaančh tehñ jiatcø'øy maa mijtsän, hoyyä Diosmädia'agy hajxy mja mäböcy. Yhamdsoo huudájjac jaduhñ miøødt-sänaaby. Ni pøn jaduhñ quia'a jatcø'øy, ni ja'a capjä jiudíoshajxy. <sup>2</sup> Hahixøøby jaduhñ coo yø'öya'ay hajxy mga'a mägu'ughájñät. Cu mhojy hajxy jaduhñ. Jaduhñ hajxy cu mjootmayhajty. Pero cab hajxiäda'a waamb tøø mnä'ägädä näma'ay. Hočhähdiuunnä jaduhñ coo hajxy mga'a hojy. Cab jaduhñ yhojy coo hajxy mniguiumayii. <sup>3-4</sup> Hóyhøch jim nga'a jagä hity maa mijtsän, nmøødhøch cuhdujt jaduhñ cooçh mijts nhané'emät ja'a Jesucristocøxpä coo jaaya'ay hajxy mga'a mägu'ughájñät, ja'a yhamdsoo huudaj jaduhñ miøødtsänaabiä. Mänit hajxy myajpädsómät coo hajxy hñajty mhamugø'øy. Dióshøch ja'a cuhdujt jaduhñ xmiooyy cooçh mijts jaduhñ nhané'emät. <sup>5</sup> Cab hajxy jim myajméjtsnät maa tsajtøjcän. Ween jaduhñ chaächtiiñii ja'a møjcu'ugóngäm. Wehñdä jaduhñ yhuuc tehñ wyiinmahñmédsät coo haxøøg jiatcø'øy. Mänit jaduhñ ñähwá'adsät ja'a piojpä quiädieey. Mänit jaduhñ jim ñöcxpät tsajpootyp coo Jesucristo yaa quiädaactägätsät, ja'a nWiindsønñájtämbä.

<sup>6</sup> Cab jaduhñ yhojy coo hajxy myajcumáyät. Huuc mädown hajxy, coo jäya'ay tsajcaagy hajxy yajcojy, mñitä chooy hajxy piädaacä harinajooty. Mänit hajxy yajmäti-jwäditø'øy. Mñitä harina chooy yajtägø'øyii. <sup>7</sup> Paadiä craa hajxy mga'a yajméjtsnät maa tsajtøjcän coo mijts jaduhñ mnä'a pahíjxpät ja'a haxøøgpä. Jaduhñ mijts jaduhñ mga'a padu'udägóobiät. Hix, tøø Jesucristo hajxy xñähho'túutäm. Jaduhñ nbojhájtäm ngädieeyhájtäm hajxy xyajñähwáatsäm. <sup>8</sup> Jaduhñds je'e, tsögä haxøøgpä hajxy najtshixøøyyäm. Tsögä tøyhajtpä hajxy hamuum-

du'joot hoy yajtu'uyóhyäm.

<sup>9</sup> Tøøch mijts ja'a nocy tu'ug nyajnäjaayø'øy coo hajxy mga'a mägu'ughádät ja'a jäya'ayhajxy haxøøgwädijpä. <sup>10-13</sup> Je'ečh jaduhñ nnänøømby pønða'a tyijy tuumb hermano. Cab hajxy jaduhñ mmägu'ughádät ja'a hajxy wiingto'oxiøjc pawädijpä, møød hajxy jäya'ajie'e hadsojpä, møød ja'a quepychech hajxy wiingudsähgøøbiä, møød hajxy jäya'añhwaambejpä, møød hajxy jaduhñ múucäp wädijpä, møødä jäya'ayhajxy mee'tspä. Ni jäya'ay jaduhñbä hajxy mga'a møødcáyät, pøn tyijy jaduhñ tuumb hermano. Tsipcøxp hajxy jaduhñ jim mhøxquejxpädsómät maa tsajtøjcän, pønjaty jaduhñ haxøøgwädijp. Pero cab højts cuhdujt nmøødhájtäm maa jäya'aguiøxpähajxiän, ja'a hajxy ca'a tuumbä hermano, hoy hajxy jaduhñ jia wädijpä haxøøg. Dios jaduhñ najuøøby nebiä tsaächpä hajxy mio'owa'añii. Homiajatiä jäya'ay hajxy nbáatäm ja'a hajxy haxøøgwädijpä, møød ja'a jäya'ajie'e hajxy hadsojpä, møød ja'a mee'tspähajxy, møød ja'a quepychech hajxy wiingudsähgøøbiä.

## 6

<sup>1</sup> Hermanodøjc, coo mijts hänäjty mniñäxø'øwø'øwa'añii, jim hajxy mnócxät maa Dios quiu'ugän; cab hajxy jim mnócxät maa cuduunghajxiän, ja'a Diosmädia'agy hajxy ca'a mäbøjpä. Jaduhñä hermanohajxy näje'e jiatcø'øy. <sup>2</sup> Tøgä cab hajxy mnajuø'øyä coo højts jäya'ayhajxy nägøxiä nyajtøyhajtyegáanäm ja'a hädaa yaabä naaxwiimbä, coo Jesucristo quiädaactägátsät. Paady hajxy hänäjty jaduhñ ndunáanäm coo Dios hajxy xquiu'ughájtäm. Hoorä, pø myajtøyhajtyegaamby hajxy hänäjty jaduhñä, tii hajxy coo mga'a jajpä yajtøyhajtyec mädyiibä ca'a tsipjaty. <sup>3</sup> Tøgä cab hajxy mnajuø'øyä coo

Diosmoonsäbaady hajxy nyajtøyhajtyegáañämbä, ja'a hajxy jim hijpä Dioswiinduum. Jaduhnds je'e, hoy hajxy jaduhñ nyajtøyhajtyéjcämät mädyiijaty hädaa yaabä naaxwiimbä. <sup>4</sup> Pø jii hajxy tijaty myajtsibø'øy ja'a hädaa yaabä naaxwiimbä, tii hajxy jim coo nøcxy myajtødiägø'øy maa hajxy ca'a mæbøjpän. <sup>5</sup> Hoçhähdiiuunnä hajxy jaduhñ mjatcø'øy. Jii jajpähäna'cäda'aduhñ maa mijtsän tu'ug metsc. Je'eduhñ xyajtødiägø'öyyäp ja'a mdsiphajxy, hermanodøjc. <sup>6</sup> Cab jaduhñ yhooyä coo hajxy hamiñ haxøpy mniñäxø'øwø'øwø'øjät maa cuduungän, ja'a Diosmädia'agy ca'a mæbøjpä.

<sup>7</sup> Coo hajxy hänajty tijaty myajtsibø'øy, myajcähxø'py hajxy hänajty jaduhñ coo Diosmädia'agy hajxy hoy mga'a cudiuñ. Maas hoy hit jaduhñ coo pøn xmiägädiéeyät, coo pøn xmiäméedsät, cab hajxy mnäxø'øwø'øwät. <sup>8</sup> Pero cab jaduhñ yhooyä coo hajxy mnimiägädieeyø'øjät, coo hajxy mnimiäméedsø'øjät, haagä hermanodøjc.

<sup>9</sup> Tøgä cab hajxy mnajuø'øyä coo haxøøghäna'c-hajxy jim quia'a tägø'øwa'añ maa Dioswiinduumän. Tøyhajt jaduhñ. Jue'eçh jaduhñ nnänøømby ja'a haxøøgjäya'ay-hajxy, ja'a hajxy nimioødtsänáayyäbä jabiøcy, møød hajxy quepychech naaxpoch wiingudsähgøøbiä, møød hajxy wiingjäya'ay tio'oxiøjc møødtsänaabiä, møødä jäya'ay miäya'adiøjc møødtsänaabiä, <sup>10</sup> møødä mee'tspähajxy, møød hajxy jäya'ajie'e hadsojpä, møød hajxy múucäp wädijpä, møød hajxy wi'i quiapxpä, møød hajxy mee'tspä høhnda'agyhaam. Pønjaty jaduhñ jatcøøby, cab hajxy jim tiägø'øwa'añ maa Dioswiinduumän. <sup>11</sup> Jaduhñ hajxy hijty näje'e mbajatcøøbiä. Pero tøø Dios ja'a mbojpä mgädieeyhajxy xyajnäwha'açh ja'a yhEspirituhaam maa Jesucristocøxpän, ja'a hajxy nWiindsøn'hájtämbä. Jaduhñä Dios hajxy tøø xpiädáacäm coo hajxy hoy



nwädíjtámät, coo hajxy hoy njäya'ayhájítámät nebiä jioot jaduhñ chocy.

<sup>12</sup> Jaduhñä jäya'ayhajxy näje'e miäna'añ coogä cuhdujt jaduhñ myiñ cooc hajxy hotyijatiä ndúunämät nnáxämät. Tøyhajt jaduhñ. Pero cab jaduhñ xyhahixóoyyämät coo hajxy cəxiä wiinä ndúunämät nnáxämät. Y cab hajxy ndehm yaghanáxämät nebiä nwiinmahñdy hajxy hoy nhəxhíjxämät. <sup>13</sup> Paadiä Dios jəø'xytiəjc caadiəjc hajxy xmióoyyäm coo hajxy jaduhñ ngáayyämät coo hajxy jaduhñ nhúucämät. Pero nä'a mädöyyä hajxy ngáayyämät nhúucämät, cab hajxy ngaayyhanáxämät. Pero cab jaduhñ ñejiä pə cáayyäm pə ca'a ngáayyäm; hix, ñä'ägädä yajcuhdägoyyaambiä Dios je'e. Paadiä Dios hajxy xpiädáacäm coo miädia'agy hajxy ngudiúunämät. Pero cabä jioot jaduhñ chocy coo hajxy haxəøg nwädíjtámät.

<sup>14</sup> Nebiä Dios ja'a yHuung yagjujypiəjquiän, jaaná jaduhñ hətjts xyagjujypiəgáanəmbä ja'a miäjaahaam.

<sup>15</sup> Huuc madow hajxy, coo Jesucristo hajxy nWiindsənhájítäm, paady jaduhñ quia'a nä'ägädä hoyyä coo cuhhiñdo'oxiəjc hajxy nməødmáawämät.

<sup>16</sup> Jaduhñä Diosmädia'agy miäna'añ, coo jäya'ayhajxy ñimiəødma'awəøjät, jaduhñä Dios yhixy nebiä tu'ugpä jäya'ayän. Jaduhñds je'e, coo cuhhiñdo'oxiəjc hajxy nməødmáawämät, jaduhñä Dios hajxy xyhíjxäm nebiä tu'ugpä jäya'ayän. <sup>17</sup> Pero coo Jesucristo miädia'agy hajxy nbanəcxämät, tu'ugjoot tu'ugwiinmahñdy ja'a Jesucristo hajxy jaduhñ nməødhíjtámät.

<sup>18</sup> Cabä cuhhiñdo'oxiəjc hajxy mməødmá'awät; haxəøg jaduhñ. Hoy hajxy nej cu mja jatcəøw, cabä mni'x cabä mgəpc nej jiaty jádät. Pero coo cuhhiñdo'oxiəjc hajxy mməødmá'awät, mnä'ägädä mägädiehbiä mhamdsoo ni'x ja'a mhamdsoo copc hajxy jaduhñ. <sup>19</sup> Nej, cab hajxy

mnajuø'øyä coo Dioshespíritu jiiiby yhity mjuøhñdiooty-hajxiä. Dios hajxy jaduhñ xmiøoyy. Jaaya'ay hajxy jaduhñ xyhuunghajp, paadiä miädia'agy hajxy myajtúunät; cabä mhamdsoo cuhdujt hajxy myajtúnät. <sup>20</sup> Paady hajxy xyhuunghaty coo yHuung hajxy xñähho'tuuty. Paady hajxy hoy mwädítät, jaduhñ hajxy myajcähxó'øgät coo Dios miøjjä jiaančhä.

## 7

<sup>1</sup> Hoorä, tsøg hajxy mädiáacäm waambátyhøch mijts xmiäyajtøoyy nocyhaam. Hoy hit jaduhñ coo ya'adiøjc ja'a to'oxiøjc quia'a møødtsänä'awät. <sup>2</sup> Pero coo hajxy hänajty mga'a mee'xtuga'añ, maas hoy hit jaduhñ coo to'oxiøjc hajxy mnä'ägädä pøgät, y weenä to'oxiøjc ja'a ñihyhap miøødhájpät. <sup>3-4</sup> Ja'a pøcyjiäya'ayhajxy, hamiñ haxøpy hajxy ñimiøødma'awøøjät. Cabä cuhdujt hajxy mmøødä maa mhamdsoo ni'xhajxiän. Hiḅ, pø xmiøød-ma'awaambä mjamiøød jaduhñ, naḅy mdehñ miøød-má'awät, cab jaduhñ mnimiøjjø'øgøøjät. <sup>5</sup> Jaduhñ hajxy mnä'ägädä cuhdujthádät coo møjcu'ugong hajxy xñä'ä yajtu'udägóyyät. Coo hajxy jaduhñ nämetsc mmänä'anät coo Dios hajxy mba'yá'axät, mänit jaduhñ yhoyyä coo hajxy mga'a nimiøødma'awøøjät hamiñ haxøpy. Hoorä, coo Dios hajxy hänajty tøø mba'ya'axy, mänit hajxy mnimiøødmáawägombät. Mänitä møjcu'ugong hajxy jaduhñ xquia'a yajtu'udägóyyät.

<sup>6</sup> Cábøch jaduhñ nmäna'añ coo hajxy mädsib'øbä mbøgät. Nnä'ä móobiøčhä cuhdujt jaduhñ. <sup>7</sup> Maas hoy hit jaduhñ coo hajxy jaduhñ mnä'ägädä hídät nidiuhñ nébiøch høøch jaduhñ nhitiän. Pero cøjhaminø'øy ja'a Dios hajxy tøø xpiädáacäm. Näje'e hajxy tøø xpiädáacäm coo hajxy nidiuhñ nhíjtämät, näje'e caj.

<sup>8</sup> Jaduhñds je'e, pøn jaduhñ nidiuhñhajnä, jaduhñ ñäl'ägädä mähmó'owät nidiuhñ nébiöch hөөч nhitiän. Y jaanä jaduhñduhñbä, ja'a yaamgto'oxyhajxy, cab hajxy piøjtägätsät. <sup>9</sup> Pero pø cab hajxy mmee'xtuga'añ, maas hoy hit jaduhñ coo hajxy mbógät, coo cuhhiñdo'oxiøjc hajxy xñäl'ä yajcuhhínät.

<sup>10</sup> Pero pønjaty jaduhñ tөө piøjnä, cham hajxy nmä-gapxy nhane'emy. Ca'a yhööch nhamdsoo mädia'agy hä-daa; Diosmädia'agy hädaa. Cab jaduhñ yhooyä coo to'oxiøjc ja'a ñihyhap piuhwá'adsät. <sup>11</sup> Pero coods jaduhñ piuhwá'adsät, cabä wiingya'adiøjc wyiingpógät. Maas hoy coo ñihyhap ñäl'ägädä nämejtstägätsät. Y ja'a ya'adiøjc, jaanä jaduhñ je'ebä, cabä tio'oxiøjc yhöxmädsät.

<sup>12</sup> Chámhөch njaac mädia'aga'añ. Ja'a nhamdsoo mädiá'agyhöch hädaa; cab jaduhñ jim myiñ cujaay maa Diosmädia'aguiän. Pø jii ya'adiøjc tu'ug mäbøjpä, pø cabä tio'oxiøjc miäböcy, cabä tio'oxiøjc yhöxmädsät pø jaac mөөdtsäna'awáanäp ja'a tio'oxiøjcäm. <sup>13</sup> Jaanä jaduhñduhñbä, pø jii to'oxiøjc mäbøjpä, pø cabä ñihyhap miäböcy, cabä ñihyhap ñähgué'egät pø jaac mөөdtsäna'awáanäp ja'a ñihyhápäm. <sup>14</sup> Coo ya'adiøjc ja'a Diosmädia'agy hánajty quia'a mäböcy, yaghoyóøyyäp je'e ja'a tio'oxiøjcäm je'eguiøxpä coo tio'oxiøjc miäböcy. Jaanä jaduhñduhñbä, coo to'oxiøjc ja'a Diosmädia'agy hánajty quia'a mäböcy, yaghoyóøyyäp je'ebä ja'a ñihyhápäm je'eguiøxpä coo ñihyhap miäböcy. Coo hajxy jaduhñ yhodiiumä, paadiä yhuunghajxy jaduhñ yhodiúumäbä. Pø cabä tiaj tieedy häxøpy nidu'jäya'adiä quia'a mäböcy, cab hajxy häxøpy yhodiúumäbä. <sup>15</sup> Pøn jaduhñ mäbøjpä, coo jiamioød ja'a ca'a mäbøjpä hadsip miäná'anät coo hajxy ñiyhöxmadsóøját, ween hajxy jaduhñ ñiyhöxmaçhii. Jaduhñ jíajcombät nebiä tөө quia'a pøquiäbä. Hiç, chojpiä Dios jioot jaduhñ coo hajxy hoy nhíjtämät. <sup>16</sup> Pøn jaduhñ

mäbøjp, cab jaduħñ yajnajuø'øy pø yajmäbøgaambytiä ja'a jiamiøød ja'a ca'a mäbøjpä.

<sup>17</sup> Cøjhaminø'øy ja'a Dios hajxy tøø xpiädáacäm. Jaduħñ hajxy jootcujc njaac h́jtämät neby hajxy hánajty nh́jtäm mänaa Dios hajxy xyajnáhdíjjäm coo hajxy nmädúunämät. Hädaa mädiá'agyhöch homiaajä nyajnáhixøøby majatiä hermanodøjc-hajxy yhamugø'øyän Dioswiingudsähgøøbiä. <sup>18</sup> Højts judíos, coo Jesucristo miädia'agy hajxy nbanócxäm, cab hajxy ndsähdiúunämät, hoy hajxy nja judíoshájtäm. Y ja'a jäya'ayhajxy ca'a judíospä, ja'a Jesucristo miädia'agy hajxy panøcxpä, ni je'ehajxy quia'a tsähdiúnät, hoy hajxy quia'a ja judíoshaty. <sup>19</sup> Cab jaduħñ ñejpiä pø mjudíoshájp, pø caj. Je'e nä'ägädä tsoobaatp coo Dios miädia'agy mgudiúunät. <sup>20</sup> Jaduħñ hajxy mjaac hídät neby hajxy hánajty mhitiän mänaa Dios hajxy xyajnáhdijjiän coo miädia'agy hajxy mmäbøjcät. <sup>21</sup> Näje'e mijts jäya'ay xjie'ehaty nebiä waj nebiä cuaayän, hoyyä Diosmädia'agy hajxy mja panøcxy. Cab hajxy jaduħñ mmøjpdá'agät. Pero pø cabä mwiindsøn hajxy xyajtunaannä, ween hajxy xyhöxmajtsnä. <sup>22</sup> Tøø mijts ja'a Dios xyajnáhdijy coo miädia'agy hajxy mmäbøjcät, hoyyä jäya'ay hajxy hánajty xjia je'ehaty nebiä waj nebiä cuaayän. Hix, tøø Jesucristo hajxy xyajnáhwáatsäm ja'a nbojpähájtäm ja'a ngädieeyhájtäm. Hoorä, pønjaty hánajty ca'a je'ehájtäp jaduħñ nebiä waj nebiä cuaayän mänaa hajxy yajnähdiyjijjän ja'a Diósäm coo miädia'agy hajxy miäbøjcät, moonsä hajxy je'e tiúnäp ja'a Jesucristocøxpä. <sup>23</sup> Tøø Jesucristo hajxy xñähho'túutäm, paadiä Dios miädia'agy hajxy nmäbøjcänä. Cabä jäya'ay miädia'agy hajxy nmäbøjcänät. <sup>24</sup> Jaduħñds je'e, hermanodøjc, jaduħñ hajxy mjaac hídät neby hajxy hánajty mhitiän mänaa Dios hajxy xyajnáhdijjiän coo miädia'agy hajxy

mmäbójcät. Jaduhñä Dios hajxy hoy mmädúnät.

<sup>25</sup> Myajtøw hajxy jaduhñ pø hahixøøby jaduhñ coo cäxyiihäna'c-hajxy piógät. Høøch nhamdsoo mädia'agy hädaa; cab jaduhñ jim myiñ cujaay maa Diosmädi-a'aguiän. Pero hahixøøby jaduhñ cooçh mijts nmädi-a'agy xmiäbójcät; hiç, Dióshøch jaduhñ tøø xyajñahdijy cooçh mmädúnät. <sup>26</sup> Pues høøch jaduhñ mänaamb coo jaduhñ yhahixø'øy coo hajxy mga'a pógät, je'eguiøxpä coo tsø'ty häyohn wiädijnä jäda'ahaty. <sup>27</sup> Pø jii mdo'ox-iøjc, caj mhøxmádsät. Y pø cabä to'oxiøjc mmøødä, ca'a mhøxta'ay. <sup>28</sup> Cab jaduhñ yhaxøøgä coo mbógät; y coo cäxyiihäna'c jaduhñ piógät, ni jaduhñ quia'a haxøøgä. Pero coo hajxy jaduhñ piógät, maas hamäjaa jiugyhajt hajxy miänaxa'añ. Páadyhøch jaduhñ nja mäna'añ coo hajxy quia'a pógät.

<sup>29</sup> Hermanodøjc, jue'eçh jaduhñ nja mäna'ana'añ, ja ween quia'a habaady coo Jesucristo yaa quiädaactägat-sa'añ hädaa yaabä naaxwiin. Cab hajxy yaa jejcy njaac tunáañäm. Jaduhñds je'e, pønjaty to'oxiøjmøød, jaduhñ hajxy xyiicta'ag miädiaactá'agät nebiä Dios hajxy hoy miädúnät. Cabä yhuung tio'oxy hajxy ñädaj ñämáañät. <sup>30</sup> Pønjaty jaduhñ jootmayhajp, ween hajxy jaduhñ quia'a jootmayhajnä. Pønjaty jaduhñ xoonäacp, ween hajxy jaduhñ quia'a xoonäacnä. Y ja'a hajuubiädøjc-hajxy, ween hajxy jaduhñ yhity nebiä toogy hajxy ca'a møødpän. <sup>31</sup> Pønjaty jaduhñ yaa tsänaaby häyoob hädaa yaabä naaxwiin, ween hajxy jaduhñ yhity neby hajxy tii ca'a møødpän. Hiç, hädaa yaabä naaxwiin, neby hajxy chamñhíxäm, cøxaamb hädaaduhñ quiuhdägoyya'añ.

<sup>32</sup> Jaduhñhøch njoot chocy coo hajxy tii mga'a nädaj mga'a nämáyät. Ja'a ya'adiøjc nidiuhmhajpä, caj tii ñädajy ñämáy. Jagoo tiajy miay nebiä Dios hoy miädúnät.

<sup>33</sup> Pero ja'a craa to'oxiøjmøødpä, je'e tiajpy miaaby nebiä

yhuung nebiä tio'oxy hoy miøødhídät. <sup>34</sup> Y cabä Dios hoy miäduna'añ. Jaaná jaduhñä cäxyiihäna'c-hajxypä, cab hajxy tii tiajy miay. Jagoo hajxy tiajy miay nebiä Dios hajxy hoy miädúnät. Hamuumdu'jootä Diosmädia'agy hajxy quiudiuna'añ. Pero ja'a to'oxiøjc ja'a ya'adiøjmøødpä, nebiä ñihyhap hoy miøødhídät, je'eyyä ñä'ä tajpy ñä'ä maaby.

<sup>35</sup> Páadyhøch jaduhñ nmäna'añ, mijts jaduhñ nja puhbedaan. Caj mijts jaduhñ nhane'ema'añ. Pero chójpjøch njoot jaduhñ coo hajxy hoy yajxón mwädítät, coo Diosmädia'agy hajxy hamuumdu'joot mgudiúnät.

<sup>36</sup> Pø jii mhuunghajxy tøø quiäxyiijø'øy, ween hajxy piøcy, pø chojpy mjoothajxy jaduhñ. Cab jaduhñ yhaxøøgä coo hajxy jaduhñ piøgät. <sup>37</sup> Pero pø cabä mjoothajxy chocy coo hajxy piøgät, ween hajxy jaduhñ quia'a pøcy. Hiñ, cabä cuhdujt pøn miøødä coo miich xyhané'emät maa mhuungcøxpän. <sup>38</sup> Hoy jaduhñ coo mhuung myajpøgät. Jaaná hoy jaduhñmä coo mga'a yajpøgät; cab jaduhñ ñejpiä.

<sup>39</sup> Ja'a to'oxiøjc ya'adiøjmøødpä, cabä cuhdujt miøødä coo wiingpä miøødtsänä'awät. Pero coo ñihyhap yhó'ogät, mänit mæbøcy wyiingpøgät pøn jaduhñ chojpy. Pero tsipcøxpä hermano wyiingpøgät. <sup>40</sup> Pero maas jootcujc yhídät coo quia'a nä'ägädä pøjtägätsät. Høøch jaduhñ mänaamb. Ja'a Dioshespíritøch ndijy jaduhñ xñajtsapxøøyyäp.

## 8

<sup>1</sup> Naje'eçh hajxy tøø xmiäyajtøy pø hoy jaduhñ coo animalho'ogy hajxy ndsú'tsämat ja'a häna'c-hajxy quepychechwiinduum yojxypä. Tøyhajt jaduhñ coo hajxy nägøxiä tøø nmädoyhájtäm hädaagøxpä. Cab jaduhñ yhooyä coo hajxy nmánáanämät cooc tyijy hajxy cøxiä

nwiinjuóyyäm. Jaduhñä häna'c-hajxy näje'e miä-naambä, ja'a hajxy jajcumayaambä. Pero coo hajxy hamiñ haxopy nniçhojc nnimiée'xämät, mänitä Diosmä-dia'agy hajxy maas hoy nmäbójcämät. <sup>2</sup> Pøn jaduhñ mänaamb cooc tyijy hotyijä jiaty, hønñdaacp jaduhñ. Cab jaduhñ tiöyyä coo hotyijä jiaty. Ween jaduhñ jiaac haböcy. <sup>3</sup> Pønä Dios jaduhñ wiingudsähgøøby, ñajuøöbiä Dios jaduhñ pøn je'e.

<sup>4</sup> Tsøg hajxy jadähooc jaac mädiácäm pø hoy jaduhñ coo animalho'ogy hajxy ndsú'tsämät, ja'a häna'c-hajxy quepychechwiinduum yojxypä. Bueno, nnajuóyyäm hajxy coo quepychech naaxpoch quia'a jujyquiä. Y nna-juóyyäm hajxy coo Dios tiu'ugä. <sup>5</sup> Mayyä jäya'ayhajxy jaduhñ miäna'añ cooc tyijy ja'a Dioshajxy miayyä jim tsajpootyp chaads yaa hädaa yaabä naaxwiin. Je'eg hajxy jaduhñ jiaançh wiingudsähgøøby. <sup>6</sup> Pero højts jaduhñ mänäänäm coo Dios tiu'ugä, ja'a nDeedyháltäm. Je'e jaduhñ hädiuun cøxiä näguipxy møødä yHuung. Paady hajxy jaduhñ xquiunú'xäm xpiädácäm coo hajxy jaduhñ ween nwiingudsähgøøyyäm. Jaduhñ hajxy nmäänänäm coo Jesucristo hajxy nWiindsøn'háltäm. Cabä wiingpä hajxy nwiindsøn'háltäm. Møød je'e cøxiä yhädi-uumbä. Høxtä højtspaadyháltäm hajxy xquiunú'xäm.

<sup>7</sup> Pero cabä jäya'ayhajxy nägøxiä miäböcy coo quepychech quia'a jujyquiä, coo naaxpoch quia'a jujyquiä. Näje'e jäya'ay quepychech naaxpoch hajxy wyiingud-sähgø'øyñä. Y coo hajxy jaduhñ chú'udsät tijaty jäya'ayhajxy yojxyp quepychechwiinduum, jootmayhajp hajxy jaduhñ cooc tyijy jaduhñ quia'a hoyyä coo hajxy chú'ud-sät. Hiç, je'enä hajxy jaduhñ miäböcyñä cooc tyijy quepychech jiujuquiä. <sup>8</sup> Nnajuóyyäm hajxy coo Dios quia'a møjpäda'agy pø ndsú'tsäm pø caj ndsú'tsäm. Cab jaduhñ ñejpiä pø ndsú'tsäm pø caj ndsú'tsäm. <sup>9</sup> Pero hoy hajxy

nja najuóoyyám jaduhñ coo quia'a nejpiä pø ndsú'tsäm pø caj ndsú'tsäm, maas hoy hit jaduhñ coo nga'a tsú'tsämät, pø jii hermanohajxy näje'e quia'a najuøöbiä coo jaduhñ quia'a nejpiä coo hajxy ndsú'tsämät. <sup>10</sup> Tsøc mädiáacäm coo miičh mnajuø'øy coo jaduhñ quia'a nejpiä coo yø'ø-duhmbä tsu'učh mdsú'udsät. Hoorä, tsøc mänáanäm coo miičh yø'øduhmbä tsu'učh hánajty mdsu'učh maa quepychechwiinduumän. Hoorä, coo hermano jaduhñ tu'ug xyhíxät, ja'a ca'a najuøöbiä coo jaduhñ quia'a nejpiä coo miičh jaduhñ mdsú'udsät, wehñdä je'e xpiadsú'tspät. Wehñdä miäná'anät cooc tyjy jaduhñ tøø quiädieey coo jaduhñ tøø xpiadsu'učh. <sup>11</sup> Y coo jaduhñ quiädieéyät, mi-ichä pojpä hánajty mmøød je'eguiøxpä coo miičh hánajty jim mgay. Hix, tøø mähdiøjc ñähho'tu'udyii ja'a Jesucristäm. <sup>12</sup> Y coo miičhä mähdiøjc jaduhñ myajcädieéyät, jaduhñ hánajty tøø piaady nejpä miičhä Jesucristo hánajty tøø mmägadieeyän. <sup>13</sup> Hoorä, pø cädieeyaambä hermano tu'ug je'eguiøxpä cooč høøčh yø'øduhmbä tsu'učh ndsu'učh, cáboch jaduhñ nnä'ägädä tsú'udsät mänaa, coo hermano ñälä cädieéyät.

## 9

<sup>1</sup> Cáboch pøn xyhane'emy, túhmäts. Dióshøch xwyi-inguejx, túhmäts. Hamdsoöchä Jesucristo nhijxy, túhmäts, ja'a hajxy nWiindsøn hájtämbä. Mijts ja'a Diosmädia'agy nyajmábøjc, túhmäts. <sup>2</sup> Näje'e jäya'ayhajxy miäna'añ cooc tyjy høøčhä Dios tøø xquia'a wiinguexy. Pero mmøødä tøyhajt hajxy jaduhñ coöchä Dios tøø xwyiinguexy, je'eguiøxpä cooč mijts nyajmábøjcy ja'a Diosmädia'agy.

<sup>3</sup> Coöch pøn mänaa xñäma'ay cooc tyjy høøčhä Dios tøø xquia'a wiinguexy, jadúhñhøch naxy nhadsoy: <sup>4</sup> Nmøødhøch ndijy cuhdujt jaduhñ coöch mijts



cay hu'ugy nmäyujwá'anät je'eguiøxpä coo'chä Diostuung nduñ. <sup>5</sup> Ja'a Jesucristo yhuchhajxy, miøødä cuhdujt hajxy je'e coo hajxy wiädítät to'oxiøjmøød. Jaduhnä Pedro miøødäbä, møødä Dioswiinguexypähajxy. Jadúhnhøch cuhdujt nmøødäbä, hoyyä jäya'ayhajxy näje'e jia mäna'añ cooc tyjy høøch nga'a møødä. <sup>6</sup> Tøgä mmánaamb mijts jaduhnä coo højts cuhdujt nga'a møødä coo højts nduung najtshixø'owät, coo højts ja'a Diosmädia'agy nyajwá'xät, høøch møødä Bernabé. Ja'a Diosquexyhajxy nägøxiä, tøø tiuung hajxy ñajtshixø'oy coo Diosmädia'agy hajxy yajwa'xy. <sup>7</sup> Yajmäjuuby hajxy je'e, y jaduhn højts nyajmäjuyaambä. Hiç, yajmäjuubiä soldadohajxy. Y jaanä jaduhnduhmbä, ja'a cudsaatypcamhajxy, jiø'xypä tsaatytsa'am hajxy. Y jaanä jaduhnduhmbä, ja'a meegcueendähajpähajxy, yhuucypiä meegtsi'tsnøø hajxy. <sup>8</sup> Ca'a yhøøch nhamdsoo mädia'agy hädaa; jaduhnä mädia'agy miänaambä ja'a Moisés jecy quiujáhyäbä. <sup>9-10</sup> Jaduhn jim myiñ cujaay: “Cabä waj mhaxuu'tsø'ogät coo trigopajc hánajty tiehñjo'öch.” Coo Dios jaduhn jecy miänaañ, jaduhn miänaañ coo højts nyajmäjúyät. Hiç, ja'a häna'c naaxpuhbähajxy møødä tsijpädøjc-hajxy, ñajuøøby hajxy jaduhn coo hajxy yajmäjuya'añ. Jaanä jaduhn højtspä, jaduhn højts nyajmäjúubiät. <sup>11</sup> Coo højts mijtsä Diosmädia'agy tøø nyajnähixø'oy, paady hajxy xmiäjúyät. <sup>12</sup> Mmäjuubiä Diosquexy hajxy, túhmäts; maas may højts cuhdujt nmøødä coo højts mijts xmiäjúubiät.

Pero cahnä højts mänaa nmäna'añnä coo højts nyajmäjúyät. Choippy højts njoot jaduhn coo Diosmädia'agy wiá'xät, ja'a Jesucristocøxpä, paady højts nhity jamiäjuy. <sup>13</sup> Pero nmøød højts cuhdujt jaduhn coo højts nyajmäjúyät. Hiç, ja'a häna'c-hajxy jim tuumbä tsajtøgooty, miøødä cuhdujt hajxy je'e coo hajxy quiáyät tijatiä cu'ughajxy jim quiuyoxøøby maa altarän.

<sup>14</sup> Jaanä jaduh<sub>n</sub>duh<sub>m</sub>bä, tøø Dios yhane'emy coo Diosmädia'agy-yajwa'xpähajxy yajmäjuyät. Ja'a jäya'ayhajxy mädoobä, je'eds hajxy jaduh<sub>n</sub> mäjuyäp. <sup>15</sup> Pero høøch, cábøch mänaa tøø nmäna'añ cooçh mijts xmiäjuyät. Jaduh<sub>n</sub>høch njoot chocy cooçh jamiäjuy ndúnät. Y cooçh häyaa nnä'a yuuhó'ogät, cab jaduh<sub>n</sub> ñejpiä, nägooçh hänäjty tøø nduñ jamiäjuy.

<sup>16</sup> Näje'e jäya'ayhajxy yajcumaya'añ je'eguiøxpä coo Diosmädia'agy hajxy yajwa'xy. Pero Dióshøch xwyiinguejx cooçh nyajwá'xät høøch; cábøch hamdsoojoot nyajwa'xy. Paady, cábøch nyajcumaya'añ. Y cooçhä Diosmädia'agy jaduh<sub>n</sub> nga'a yajwá'xät, xyajcumädówábøçhä Dios jaduh<sub>n</sub>. <sup>17</sup> Cábøch hamdsoojoot ndägøøyy Diosmädia'agy-yajwa'xpä. Dióshøch jaduh<sub>n</sub> xwyiinguejx cooçh miädia'agy nyajwá'xät. Cooçh häxøpy tøø ndägøøyy hamdsoojoot, mänítøch cu nyajmäjuuyy. <sup>18</sup> Jaançh teh<sub>m</sub> xioondáacpøch jaduh<sub>n</sub> cooçhä Diosmädia'agy nyajwa'xy jamiäjuy, hóyhøçhä cuhdujt nja møødä cooçh cu nyajmäjuuyy.

<sup>19</sup> Hi<sub>x</sub>, cooçh jaduh<sub>n</sub> nduñ jamiäjuy, cábøch pøñ xyhane'emy. Pero chójpjøch njoot jaduh<sub>n</sub> cooçh hoy piønä xyhané'emät, nägoo Diosmädia'agy hajxy miäböçgät. <sup>20</sup> Cooçh jim<sub>n</sub> nhijty maa judíoshajxiän, jaduh<sub>n</sub>høch nguhdujthajpä nebiä judíoshajxy quiuhdujthatiän, weenä Diosmädia'agy hajxy jaduh<sub>n</sub> cu miäböçjy. Y cooçh jim<sub>n</sub> nhijty maa jäya'ayhajxy hänäjty yhane'emyiijän ja'a Diosmädia'agy, ja'a Moisés jecy quiujáhyyäbä, jaduh<sub>n</sub>høch nyaghaneh<sub>m</sub>bä neby hajxy hänäjty yaghaneh<sub>m</sub>bän, weenä Diosmädia'agy hajxy jaduh<sub>n</sub> cu miäböçjy, hóyhøçhä cuhdujt nja nmøødä cooçh nga'a yaghané'emät. <sup>21</sup> Y cooçh jim<sub>n</sub> nhijty maa jäya'ayhajxiän, ja'a cajpä judíospä, ja'a mädia'agy hajxy ca'a cudiuu<sub>m</sub>bä, ja'a Moisés jecy

quiujáhyyäbä, jadúhñhøch nguuhdujthajpä neby hajxy hñanjty quiuhdujthatiän, weenä Diosmädia'agy hajxy jaduhñ cu miäbøjpä. Cábøch nmäna'ana'añ coočhä Dios ja'a miädia'agy hñanjty nga'a mäbøjcä. Hix, nmäbøjcäbøčhä Jesucristo miädia'agy jaduhñ. <sup>22</sup> Y cooč jim nhijty maa hermanohajxiän, ja'a Diosmädia'agy hajxy ca'xy ca'a wiinjuøøbiä, jadúhñhøch nbaguhdujthajpä neby hajxy hñanjty quiuhdujthatiän, je'eguiøxpä cooč hñanjty nyajñähixø'øwa'añ nebiä Diosmädia'agy hajxy maas hoy wyiinjuø'øwät. Majátyhøch jaduhñ nwädity Diosmädia'agy-yajwa'xpä, cábøčhä jäya'ayhajxy jaduhñ nyagjootma'ady, weenä Diosmädia'agy hajxy jaduhñ miäbøcy. <sup>23</sup> Páadyhøch jaduhñ nguuhdujthaty, jadúhñhøčhä Diosmädia'agy hoy nyajwá'xät. Y coočhä jäya'ayhajxy may nyajmäbøgät, mänítøch jaduhñ nxoondá'agät.

<sup>24</sup> Coö jäya'ayhajxy naxy ñiyhøxpäyø'øgyii, tu'jäya'ay jaduhñ nøcxy quiuhäyø'øgy, ca'a ñägøxiä. Tøyhajt jaduhñ. Jaduhñ mäwiin højtshájtäm, coö Diosmädia'agy hajxy nbanøcxäm, naxy hajxy hoy ndehm quiudiúunämät, jaduhñ hajxy jim nnøcxämät Dioswiinduum. <sup>25</sup> Høxtahmäsä häyø'pädøjc-hajxy, tu'jøjpiä jioot ja'a wyiinmahñdy hajxy naxy piäda'agy coö hajxy jaduhñ quiuhäyø'øgät, túhmäts. Paadiä haxøøgpä hajxy jaduhñ quia'a nä'ägä nähdoñ. Premio hajxy jaduhñ móoyyap, y cab jaduhñ ñä'ä jecy. Pero højtshájtäm, coö Diosmädia'agy hajxy hoy njaanč tehñ quiudiúunämät, mänit hajxy jaduhñ jim nnøcxämät Dioswiinduum. Jimds hajxy jaduhñ nhíjtämät cøjxta'axiøø. <sup>26</sup> Ja'a häna'c cuhäyø'pädøjc-hajxy, tøyyä hajxy jaduhñ ñä'ä päyø'øgy, cab hajxy jaduhñ yhimybiäyø'øgy miaamybiäyø'øgy. Ja'a boxeadorhajxy jajpä mägox mädex, cab hajxy jaduhñ ñä'ä yemy ñä'ä wopy. Jaduhñ mäwíinäts høøch, tu'jøjpiøčhä

Diosmädia'agy nbanøcxy. <sup>27</sup> Cábøchä haxøøgpä jaduhñ nnä'ägä nähdoñ. Ngudiúumbiøchä Diosmädia'agy jaančh tehñ yhoy. Páadyhøchä Dios jim xyajnøcxa'añ maa wyiinduumän. Y cooçh jaduhñ hoy nga'a cudiúnät, cábøch jim xyajnøcxät, hóyhøchä jäya'ayhajxy hánajty tøø nja yajwiinhixø'øy.

## 10

<sup>1</sup> Hermanodøjc, huuc mädown hajxy jaduhñ. Jéquiänä Dios ja'a joc ja'a nämä'a jaduhñ quiejxy maa nhaphájtäm maa ndeedyhájtämhajxy hánajtiän, møødä Moisés. Mänit hajxy jaduhñ jecy piadu'ubøjcy nägøxiä näwiinä. Mänit hajxy nägøxiä ñøønajxy coo Tsaptsmejy paquiä tiøøch. <sup>2</sup> Ja'a Moisés hajxy hánajty näguipxy miøødwädiipy nägøxiä maa joc hajxy hánajty piawädiän, maa hajxy ñøønajxiän Tsaptsmejjiooty. <sup>3</sup> Mänitä Dios hajxy mioooyä ja'a cay ja'a hu'ugy. Mänit hajxy quiaaayy nägøxiä. <sup>4</sup> Mänitä Dios ja'a tsa tu'ug yajtsábijty. Mänitä nøø tiägøøyy xee'xpä. Mänit hajxy nägøxiä ñøøhuucy. Jaduhñ mäwíinäts ja'a Cristo neby yø'ø tsaajän. Hix, puhbéjtáp hajxy hánajty ja'a Crístäm majaty hajxy hánajty wiädity. Ja'a Cristo, Dios yHuung je'e. <sup>5</sup> Pero cabä Diosmädia'agy hajxy hoy nämay quiudiuuñ. Cabä Dios hajxy jaduhñ quiumaayy. Paady hajxy jim tiu'uho'cy pactuum.

<sup>6-7</sup> Paady hajxy jaduhñ jiajty yhabejty coo haxøøgpä hajxy yhadsojcy, coo quepychech ja'a naaxpoch hajxy wyiingudsähgøøyy. Hijxtahnd jaduhñ coo hajxy nga'a pahijx nga'a padúunämät. Jaduhñ jim myiñ cujaay maa Diosmädia'aguiän: “Mänit hajxy quiaaayy yhuucy quepychechwiinduum; mänit hajxy yhejch piujty quepychechwiinduum.” <sup>8</sup> Näje'e hajxy haxøøg jiatcøøyy. Paady hajxy nähii'xtägøøg mil yho'cy tu'xøøbä. Paady hajxy jaduhñ nga'a pahijx nga'a padúunämät. <sup>9</sup> Näje'e Dios hajxy

yhijxmajch pø tøyhajt hajxy hānajty yajcumādowa'añí-jām ja'a Dios. Mānit hajxy chahñchu'tsä. Cøjx hajxy je'e yho'ogy. Paady hajxy jaduhñ nga'a pahijx nga'a padúunāmāt. <sup>10</sup> Nāje'e hajxy hānajty jootcuyc quia'a hity, je'eguiøxpä coo hajxy hānajty quia'a mábøcy. Paadiä Dios ja'a mioonsä quiejxy, hoy hajxy yagho'ogyii.

<sup>11</sup> Paady hajxy jaduhñ jiajty yhabejty, hijxtahñd jaduhñ coo hajxy nga'a pahijx nga'a padúunāmāt. Paady cujaay yhity. Hix, habáatnāp jaduhñ coo Jesucristo yaa quiä-daactägatsa'añ. <sup>12</sup> Pøñ jaduhñ niñänóømāp coo hamuum-du'joot miábøcy, naxy tiehmñ niyajcopcø'øwóøjät coo ñäl'ä tu'udägóyyät. <sup>13</sup> Mijts ja'a møjcu'ugong xjia wi'i yaj-tu'udägoyyaamb. Hoy piønä jaduhñ jia yagjatcø'øwa'añii haxøøg. Pero jaduhñä Dios miāna'añ cooc hajxy xpiuhbedāanām, neby hajxy jaduhñ nga'a tu'udägóyyāmāt. Tøyhajt jaduhñ coo hajxy xpiuhbedāanām. Hix, cabä møjcu'ugongä miājaa jaduhñ miābaady nebiä Dios mājaa miøødän.

<sup>14</sup> Jaduhñds je'e, hermanodøjc, cabä quepychech, cabä naaxpoch hajxy mwiingudsähgó'øwät. <sup>15</sup> Mnajuøøby hajxy jaduhñ cooch tøyhajt nmādia'agy. Hix, mwiinjuøøby hajxy hädaaduhñ. <sup>16</sup> Coo tsuugay nyagjājtām mānaa vino hajxy nhúucām, mānitä Dioscujú'uyāp hajxy nyéjcām. Je'e jaduhñ ñänøømby coo hajxy tu'ugcopc tu'ugwiinmahñdy nhíjtām, je'eguiøxpä coo Jesucristo ñø'ty jiaañch tehñ yaghāyooyy mānaa hajxy je'e xñähho'túutām maa hädaa yaabä naaxwiinän. Y coo tsajcaagy hajxy nyajniñäguidøøyyām, je'e jaduhñ ñänøømgbä coo hajxy tu'ugcopc tu'ugwiinmahñdy nhíjtām, je'eguiøxpä coo Jesucristo ja'a ñil'x ja quiopc ñähdujcy mānaa hajxy je'e xñähho'túutām. <sup>17</sup> Coo tu'ugpä tsajcaagy hajxy ngaamiújcām, paady hajxy tu'ugcopc tu'ugwiinmahñdy nhíjtām, hoy hajxy nja nämáyyām.

<sup>18</sup> Jaduhñä judíoshajxy yhippä tu'ugcopc tu'ugwiin-mahñdy mөөдä Dios mänaa animal hajxy chu'učhän, ja'a jäya'ayhajxy yojxypä altarwiinduum. <sup>19</sup> Jadúhñhөch nmäna'añ coo quepychech naaxpoch quia'a jujyquiä. Jadúhñhөch nmänaambä coo animal quia'a cunu'u'xiä ja'a jäya'ayhajxy yojxypä quepychechwiinduum. <sup>20</sup> Caj pues. Ja'a jäya'ay ja'a Diosmädia'agy hajxy ca'a mäbөjpä, coo animal hajxy yoxy quepychechwiinduum, ja'a möjcu'ugong hajxy jaduhñ wyiingudsähgөөby, ca'a Dyiosä. Cábөch njoot chocy coo jäya'ay hajxy mmөөdhídät tu'ugwiinmahñdy, ja'a möjcu'ugong hajxy wyiingudsähgөөbiä. <sup>21</sup> Pө mhu'ugaambiä vino hajxy ja'a Dioscөxpä, cab hajxy hoy mhú'ugät ja'a möjcu'ugongcөxpä. Pө mgayaambiä tsajcaagy hajxy ja'a Dioscөxpä, cab hajxy hoy mgáyät ja'a möjcu'ugongcөxpä. <sup>22</sup> Cab jaduhñ yhoyyä coo Dios hajxy nyagjootmä'tämät. Hix, maas mäjaamөөдä Dios que höjtshájtäm.

<sup>23</sup> Jaduhñä jäya'ayhajxy miäna'añ cooc cuhdujt hajxy nmөөdhájtäm hoy ñejpiä. Tөyhajt jaduhñ. Pero cab jaduhñ yhawiinmatsä coo hajxy hoy ñejpiä njatcөyyämät. Hix, coo hajxy hoy ñejpiä njatcөyyämät, cabä Diosmädia'agy hajxy hoy nyajtu'uyóhyyämät. <sup>24</sup> Näje'e jäya'ayhajxy yhөxta'ay coo hajxy chänä'awät coo hajxy yhäyówät. Pero maas hoy jaduhñ coo nmädөjc hajxy nbuhbéjtämät.

<sup>25</sup> Tsu'udsä tsu'učh hajxy jaduhñ mädyiijaty jim tóo'cäp halaplazpa'c. Pero cab hajxy myajtówät pө tөө jäya'ay animal hajxy yoxy quepychechwiinduum. Cab hajxy je'eduhñ mnä'a taj mnä'a máyät ja'a tsu'učhcөxpä. <sup>26</sup> Hix, jaduhñä Diosmädia'agy miädia'agy: “Dios jie'e hädaa cөxiä maa hädaa yaabä naaxwiimbän.”

<sup>27</sup> Coo pөñ hajxy jaduhñ xwiówät mägaabiä, hoy jaduhñ coo hajxy mnócxät, hoyyä craa ja'a Diosmädia'agy hä-

najty quia'a jagä mäböcy. Y cab hajxy myajtówät pø tøø animal hánajty quepychechwiinduum yoxyii. Cab hajxy mdaj cab hajxy mmáyät ja'a tsu'učhcøxpä. <sup>28</sup> Pero coo pøn hajxy jaduhñ xyhawáañät coo häna'c yø'ø animal hánajty tøø yoxy quepychechwiinduum, cab hajxy jaduhñ mdsú'udsät, weenä craa jaduhñ quia'a jootma'ady ja'a hajxy tøø xyhawáañäbä. Jaduhñä craada'a tiajy miay coo jaduhñ quia'a hoyyä coo yø'øduhmbä tsu'učh hajxy ndsú'tsämät, ja'a häna'c yojxypä quepychechwiinduum. <sup>29</sup> Ja'a craa tøø xyhawáañäbä, je'ečh jaduhñ nnänøømby coo wehñdä jiootma'ada'añ. Cábøch jaduhñ nmäna'ana'añ coo mijts mjootma'ada'añ.

Näje'e jäya'ayhajxiäda'a miäna'ana'añ: “Ween yø'ø craa jaduhñ ñä'ä jootma'ady, nmøødhøch cuhdujt jaduhñ coočhä animal ndsú'udsät, hoy häna'c tøø jia yoxy quepychechwiinduum. <sup>30</sup> Haa ca'a, nnämäabiøčhä Dios Dioscuju'uyäp coočhä tsu'učh hánajty tøø ndsu'učh. Tiičh yø'ø craa jaduhñ coo xñä'ä nämä'ay coočh nga'a tsú'udsät.” <sup>31</sup> Jaduhñds je'e, tsøgä mädia'agy hajxy hoy yajxón yajtuun yaghjítäm homiädyiibä coo hajxy ngaayy coo hajxy nhúucäm. Coo jäya'ay hajxy jaduhñ xyhíjxämät coo mädia'agy hajxy hánajty hoy yajxón nyajtuun nyaghjítäm homiädyiibä, mänitä Dios hajxy miøjpäda'aga'añ jiaančhpäda'aga'añ. <sup>32</sup> Hix, coo mädia'agy hajxy hoy yajxón nyajtuun nyaghjítämät homiädyiibä, ni pøn jaduhñ quia'a jootmá'adät, ni ja'a judíoshajxy, ni ja'a jäya'ayhajxy capjä judíoshajpä, ni ja'a jäya'ayhajxy ja'a Diosmädia'agy mäbøjpä. <sup>33</sup> Jaduhñhøch høøčhpä, hoy yajxónhøčhä nyajtuñ nyaghity homiädyiibä nébiøčhä jäya'ayhajxy jaduhñ xquiumáyät. Cábøch pøn jaduhñ nyagjootma'ady. Hix, chójpiøch njoot jaduhñ coo jäya'ayhajxy nägøxiä ñähwá'adsät ja'a piojpä ja'a quiädieeyhajxy. Cábøch njoot chocy coočh nidiuhñ nbáadät ja'a hoybä ja'a weenbä.

## 11

<sup>1</sup> Nébiöchä Jesucristo nbahixiän, jaduhñhöch mijts xpi-ahíxpät.

<sup>2</sup> Hermanodöjc, xoondáacpöch jaduñ coöch mijts xjiahmiejtsta'agy homiänaajä, y coo Diosmädia'agy hajxy homiänaajä myajtuñ nebiátyhöch hajxy tөө nnajtscapxóöyyäm. <sup>3</sup> Chójpíöch njoot jaduñ coo hajxy mwiinjuó'öwät coo Jesucristo ja'a Dios Wyiindsönhaty y coo höjtsä Jesucristo nWiindsönhájtämbä, höjts ya'adiöjc-hájtäm. Jaaná jaduñnä ndo'oxiöjc-hájtäm hajxy xwyiindsönhájtämbä, höjts ya'adiöjc-hájtäm. <sup>4</sup> Maa hermanodöjc-hajxy yhamugö'yän tsajtögooty, coo ya'adiöjc jim tu'ug Dyiospa'yá'axät cuhjupmööd, cabä Jesucristo hamuumdu'joot wyiingudsähgö'y; ni jaduñ coo Diosmädia'agy cuhjupmööd yajwiinhixó'öwät. <sup>5</sup> Jaaná jaduñduhmbä, coo to'oxiöjc-hajxy jii by Dyiospa'yá'axät cuhwa'ads tsajtögooty, o coo Diosmädia'agy hajxy jii by yajwiinhixó'öwät cuhwa'ads, höchähdiuunnä hajxy je'eduhñ. Jaduhñ je'eduhñ piaady nejpiän yö'ö to'oxiöjc quiuhwaay hajxy yhöxme'xypän. <sup>6</sup> Jaduhñds je'e, pö cabä to'oxiöjc-hajxy tiägö'öwa'añ tsajtögooty cuhjuuxy, ween hajxy jaduñ ñä'ägä yajcuhme'xy. Y pö tsähdiuumb hajxy jaduñ cuhme'xy, ween hajxy ñiguiuhjuuxyii. <sup>7</sup> Pero ja'a ya'adiöjc-hajxy, cab hajxy je'e ween tsajtögooty cuhjupmööd tiägööbiä. Hix, jaduñnä Dios ja'a ya'adiöjc yhädiuunñ nebiä Diosän. Ja'a ya'adiöjc-cöxpä jaduñ quiähxö'ögy coo Dios mäjaa jiaançh tehñ miöödä. Pero ja'a to'oxiöjc-cöxpä quiähxö'ögy coo ya'adiöjc mäjaa miöödäbä. <sup>8</sup> Coö Dios ja'a to'oxiöjc jecy yhädiuunñ, jayöjpä ya'adiöjc ja'a quiaaçh tu'ug piöjcäxä. Mänitä to'oxiöjc yajwa'añguiojjä caaçhhaam. Jaduhñ jim myiñ cujaay maa Diosmädia'aguiän. Pero cab jaduñ miäna'añ coo



ya'adiøjc yajwa'añguiojjä ja'a to'oxiøjc quiaaächhaam.  
<sup>9</sup> Ja'a ya'adiøjc-cøxpä ja'a to'oxiøjc yhädiuunäbä. Cab hajxy nmänáañämät coo ya'adiøjc yhädiuunä ja'a to'oxiøjc-cøxpä. <sup>10</sup> Páadiädsä to'oxiøjc-hajxy wiädítät cuhjuuxy, jaduñ hajxy yajcähxó'øgät coo hajxy yhane'emyii ya'adiøjcäm. Jaduñnä Diosmoonsähajxy quiumay, ja'a hajxy jim tsajpootypä. <sup>11</sup> Pero jaduñnä Dios hajxy jecy xquiunúu'xäm ya'adio'oxy. <sup>12</sup> Hix, jéquiänä to'oxiøjc yajwa'añguiojjä ja'a ya'adiøjc quiaaächhaam. Jaanä jaduñduhmbä, ja'a to'oxiøjc-cøxpä ja'a ya'adiøjc myiñguia'ay.

<sup>13</sup> Huuc mäna'an mijts pø hawiinmats jaduñ coo to'oxiøjc-hajxy cuhwa'ads Dyiospa'yá'axät tsajtøgooty. <sup>14</sup> Hočhähdiauunä jaduñ coo ya'adiøjc quihwaayhajxy yoñ yajyéegät. Hoy piønä jaduñ miäna'añ. <sup>15</sup> Pero hahixóyyäp ja'a to'oxiøjc-hajxy jaduñ coo quihwaay hajxy yajyéegät yoñ; jaduñ je'eduñ miäbaady nebiä cuhmochpän. <sup>16</sup> Jaduñ højts nnä'ägädä yajnahixø'oy coo to'oxiøjc-hajxy cuhmoch Dyiospa'yá'axät tsajtøgooty. Y jaduñnä hermanohajxy nägøxiä yajnahixøbiä tsajtøgooty wiinduhmyhagajpt. Hoorä, pønjaty jaduñ mänaamb cooc tyijy jaduñ quia'a nejpiä coo to'oxiøjc-hajxy jaguiuhmoch tsajtøgooty Dyiospa'yá'axät, cabä tøyhajt hajxy ñä'ägädä møødä.

<sup>17-19</sup> Tøöch nmädoyhaty coo hajxy näje'e haxøøgtøjiämuum mniñäma'ayii maa hajxy tsajtøgooty mhamugø'øyän. Tøyhajtäda'a jaduñ. Cab jaduñ yhoyyä y cábøch jaduñ ngumay, hóyhøch jaduñ nja najuø'oy coo jäya'ayhajxy yhixa'añ pønjaty tøyhajt hoy wädijp. <sup>20</sup> Coo Jesucristo hänäjty yagho'oga'añii, mäniä jiamioød ñämaayy coo hajxy chuugaamiügät ja'a Jesucristocøxpä. Pero mijts, coo hajxy naxy tsajtøgooty mhamugø'øy, coo hajxy naxy mdsuugaamiucy, cabä

Jesucristo hajxy naxy mjahmiech. <sup>21</sup> Hanidiuhmjaty hajxy naxy mgay. Cab hajxy naxy mdajy mmay pø jii mmägu'ughajpä caayyøøc hajxy miøødä quia'a møødä. Näje'e hajxy naxy mmu'ugyii. <sup>22</sup> Jim hajxy hawiinmats mgay mhú'ugät maa mhamdsoo tøjc-hajxiän. Cab jaduñ yhoyä coo hajxy jaduñ mjatcø'øy maa Diostøjcän. Myajtsähdiuumbiä häyoobäya'ay hajxy jaduñ. Cábøch mijts jaduñ nnä'ägädä cumay coo hajxy jaduñ mjatcø'øy.

<sup>23</sup> Hamdsoöchä Jesucristo xyajnähiøøyy nébiøch mijts tøø nnajtscapxøøyyäm: Hoorä, mänittsuu, coo Jesucristo hänajty tiooga'añii, mänitä Jesucristohajxy tiägøøyy tsugaabiä møødä jiamiøødhajxy. Mänitä Jesucristo tsajcaagy quionø'cy. <sup>24</sup> Mänit Dioscujú'uyäp yejcy. Mänitä tsajcaagy yhaguidøøyy. Mänit miänaañ: “Huuc cay hajxy. Høøch nni'x høøch ngopc hädaa. Mijtsøxpøchä häna'c xtiooga'añ. Cooch mijts mänaa xjiahmiejtstä'agät, jaduñä tsajcaagy hajxy mgáyät.” <sup>25</sup> Y coo hajxy hänajty tøø chuugaabiädøñä, mänitä Jesús vino quionø'cy copajooty. Mänit miänáangombä: “Cooch mijts nnähho'tu'u-daannä, cooch nnø'ty nyaghäyowaannä, hawiinjemybiä Dios hajxy xmiøødyajcuhduga'añ. Hoorä, hädaa vino, hijxtahnd jaduñ miähmø'øwa'añ nébiøch nnø'tiän. Y naaghooc hädaa vino hajxy mhü'ugy, mänitøch hajxy xjiahmiejtstä'agät.” <sup>26</sup> Homiänaajä hädaa tsajcaagy hajxy hänajty mgaya'añ, homiänaajä hädaa vino hajxy hänajty mhü'uga'añ, myajcøhxø'py hajxy hänajty coo Jesucristo hajxy tøø xñähho'túutäm. Hix, wiimbijtägatsaambä Jesucristo. Yaa jadähooc quiädaactägatsa'añ hädaa yaabä naaxwiin.

<sup>27</sup> Nebiä Jesucristo jiamiøødhajxy miøødcaayy miøødhuuquiän, jadúñäc hajxy ngaayy, jadúñäc hajxy nhúucämbät. Pønjetiä howyiinmahñdy hänajty

## 1 Corintios 11:28351 Corintios 11:34

ca'la mөөd coo hänäjty jaduһn quiaya'añ, coo hänäjty jaduһn yhu'uga'añ, haxөөg hajxy jaduһn jiatcө'oy ja'a Jesucristo ñi'xcөxpä ñө'tycөxpä. <sup>28</sup> Jaduһnds je'e, coo hajxy hänäjty mgaya'añ ja'a Jesucristocөxpä, coo hajxy hänäjty mhu'uga'añ ja'a Jesucristocөxpä, naxy hajxy jayөjpiä mdeһm ñiñajuө'өwөjät pө howyiinmahñdy hajxy hänäjty mjaanч mөөd. <sup>29</sup> Pөnjaty jaduһn caaby huucp ja'a Jesucristocөxpä, coo hajxy jaduһn quia'a möjpäda'agät coo Jesucristo hajxy xñäһho'túutäm, yajcumädowáanäp hajxy jaduһn. <sup>30</sup> Näje'e hajxy mba'ambety; näje'e hajxy mga'a majaamөөdä. Höxtä näje'ejaty hajxy jaduһn tөө yho'ogy. Paady hajxy jaduһn mjaty mhabety coo hajxy mga'a möjpäda'agy coo Jesucristo hajxy tөө xñäһho'túutäm. <sup>31</sup> Pero cabä Dios hajxy xyajcumädöwämät coo howyiinmahñdy hajxy hänäjty nmөөdhajtäm coo hajxy hänäjty ngayáanäm ja'a Jesucristocөxpä, coo hajxy hänäjty nhu'ugáanäm ja'a Jesucristocөxpä. <sup>32</sup> Paadiä Dios hajxy tähoogaty xyajcumädöwäm, jaduһn hajxy xyajnajuө'öyyäm coo miädia'agy hajxy hänäjty hoy nga'a yajtúunäm. Y coo miädia'agy hajxy hoy nyajtúunämät, cab hajxy jiiby nnä'ä hädáacämät möjcu'uhaam maa jäya'ayhajxy yhäda'aga'añän, ja'a hajxy ca'la mäbөjpä.

<sup>33</sup> Jaduһnds je'e, hermanodөjc, coo hajxy hänäjty mänaa mgaamiuga'añ ja'a Jesucristocөxpä, coo hajxy hänäjty mänaa mhuucmuga'añ ja'a Jesucristocөxpä, naxy hajxy tu'cuһdujt mdeһm quiaaчhóonät. Mniyhahixө'өwөjöp hajxy jaduһn. <sup>34</sup> Pө myähó'cäp hajxy hänäjty, jayөjp hajxy mnä'ägä cáyät maa mdөjc-hajxiän. Jaduһnä Dios hajxy xquia'a yajcumädöwät coo hajxy hänäjty mgaamiuga'añ ja'a Jesucristocөxpä, coo hajxy hänäjty mhuucmuga'añ ja'a Jesucristocөxpä. Madiu'üch hajxy tөө xjiaac mäyajtөy. Cooч jim nñөcxät maa mijtsän,

mánítøch jim nyajtødiägø'øwät.

## 12

<sup>1</sup> Hermanodøjc, tsøg hajxy mädiáacäm nebiatiä Diosh-espíritu hajxy xpiuhbéjtäm, coo hawiingatiä tuung hajxy xmióoyyäm. Naxy hajxy jaduñ mdehm wyiinjuø'øwät.

<sup>2</sup> Mnajuøøby hajxy jaduñ, coo Diosmädia'agy hajxy hánajty mga'a panøcxyñä, je'enä quepychech naaxpoch hajxy hánajty mwiingudsähgø'øyñä. Cabä quepychech naaxpoch quiapxy miädia'agy. Jaduñ hajxy hánajty mwädity nebiä tu'udägoybän. <sup>3</sup> Huuc wiinjuø'øw hä-daa mädia'agy hajxy. Pønjetiä Dioshespíritu jaduñ najtscapxøyyäp, cabä Jesús hajxy je'e haxøøg ñänømy. Y pønjetiä Dioshespíritu jaduñ ca'a najtscapxøyyäp, cab hajxy hoy miäna'ana'añ coo Jesús hajxy nWiindsøn'hájtäm.

<sup>4</sup> Coo Diostuung hajxy jaduñ ndúunäm, hawiingatiä Diostuung hajxy jaduñ xpiáatäm. Pero ja'a Dios ja'a yhEspírituhajtiä hajxy jaduñ xtiuungmóoyyäm.

<sup>5</sup> Madiu'u ja'a Diostuung hajxy jaduñ njaančh túunäm, pero tu'jäya'ayyä hajxy jaduñ nWiindsøn'hájtäm. Ja'a Jesucristo je'e.

<sup>6</sup> Ja'a Dios hajxy xpiuhbéjtäm coo tiuung hajxy ndúunämät, nebiatiä tiuung hajxy xpiáatäm.

<sup>7</sup> Paadiä Dioshespíritu hajxy hawiingaty xtiuungmóoyyäm, jaduñ hajxy hoy nnibiuhbéjtämät hamiñ haxøpy.

<sup>8</sup> Hix, näje'e hermanohajxy tiuungmo'oyii ja'a Dioshespíritäm coo hajxy quiapx coo hajxy miädiá'agät nebiä jajpä häna'cän.

<sup>9</sup> Näje'e hermanohajxy piuhbedyii ja'a Dioshespíritäm coo hajxy hoy jiaančh tehñ miäböggät ja'a Diosmädia'agy. Näje'e hajxy miäjaamo'oyii nebiä jäya'ay hajxy yajmøcpögät, ja'a pøjc ja'a híjxäbä.

<sup>10</sup> Näje'e hermanohajxy piuhbedyii ja'a Dioshespíritäm

coo hajxy hoy-yagiuøøñä tiuñ ja'a Diosmäjaagøxpä. Näje'e hajxy tiuungmo'oyii coo Diosmädia'agy hajxy yajwá'xät. Näje'e hajxy tiuungmóoyyäbä coo hajxy yhøxcábät pøñ najtscapxóøyyäp ja'a Dioshespíritäm, pøñ najtscapxóøyyäp ja'a møjcu'ugóngäm. Näje'e hajxy piaadyii coo hajxy quiápxät wiinghayuucjaty. Näje'e hajxy piáatäbä coo hajxy quiapxhoyó'øwät waambatiä hermanohajxy tøø quiapxy wiinghayuucjaty. <sup>11</sup> Hanidiuhmjatiä Dioshespíritu hajxy xtiuungmóoyyäm, nebiä jioot chocy. Tu'uquiä ja'a Dioshespíritu jaduhñ.

<sup>12</sup> Ja'a tu'ugpä ni'x, ja'a tu'ugpä copc, madiu'u pajc miøødä. Pero tu'ugpä ni'x tu'ugpä copc hajxy jaduhñ nmøødhájtäm. Jaduhñ mäwiin højtshájtäm, tu'ugmädia'agy hajxy nhájtäm coo Jesucristo hajxy nWiind-sønhájtäm, hoy hajxy nja nämayhájtäm. <sup>13</sup> Coo hajxy nnäbéjtäm, jaduhñä Dioshespíritu hajxy xpiädáacäm tu'ugmädia'agy nägøxiä, møødä judíoshajxy, møødä capjä judíoshajxy, møødä jäya'ayhajxy je'ehájtäbä wiingháná'cäm, møødä jäya'ayhajxy hijpä hawa'adstuum. Nägøxiä ja'a Dioshespíritu hajxy nmøødhájtäm.

<sup>14</sup> Ja'a tu'ugpä ni'x ja'a tu'ugpä copc, madiu'u pajc hajxy nmøødhájtäm. <sup>15</sup> Coods yø'ø tecy jaduhñ ñä'ä mäná'anät: "Cábøch tii nmach cábøch tii nnähdoñ nej yø'ø cø'øjän, páadyhøch miičh jaduhñ xquia'a yajtuna'añ", cab jaduhñ ñä'ä tóyyäbä; haa ca'a, nyajyohy nyajnájxäm ja'a tecy jaduhñbä. <sup>16</sup> Jaaná jaduhñduhñbä, coo yø'ø taatsc jaduhñ miänáambät: "Cábøch jaduhñ nhixy nej yø'ø wiinän, páadyhøch miičh jaduhñ xquia'a yajtuna'añ", cab jaduhñ ñä'ä tóyyäbä; haa ca'a, nyajmädoowäm ja'a taatsc jaduhñbä. <sup>17</sup> Coo hajxy häxøpy nhaagä wiinhájtäm, cab hajxy häxøpy nmädóowäm. Y coo hajxy häxøpy nhaagä mädohndhájtäm, cab hajxy häxøpy tii xjiøjxuugóøyyäm. <sup>18</sup> Jaduhñä Dios hajxy xquiunúu'xäm nebiaty hajxy xya-

jmädsójcäm. Paadiä ni'x ja'a copc hajxy nmøødhájtäm, paadiä cø'ø ja'a tecy hajxy nmøødhájtäm. <sup>19</sup> Coø hajxy häxøpy nhaagä pajc-hájtäm, cabä nni'x ja'a ngopc-hajxy häxøpy yhíjtäm. <sup>20</sup> Madiu'u ja'a pajc hajxy nmøødhájtäm ja'a tu'ugpä jäya'ay. Tu'ugni'x tu'ugcopc hajxy jaduhñ nmøødhájtäm.

<sup>21</sup> Coø wiin häxøpy quiapxy, cabä cø'ø jaduhñ ñämä'awät: “Cábøch miičh nyajmaajiaty.” Jaaná jaduhñä copcpä, coø häxøpy quiapxy, cabä tecy jaduhñ ñämäabiät: “Cábøch miičh nyajmaajiaty.” <sup>22</sup> Pero nhaagä yajtuungpáatäm ja'a ni'x ja'a copc cøxiä, hoyyä pajc näje'e quia'a jagä møcä. <sup>23</sup> Cabä ni'x ja'a copc hajxy teeñmuum nyajcähxø'øgáañäm, paadiä wit hajxy nmøødhájtäm. <sup>24</sup> Pero ja'a nwiin ja'a njøjphajtämhajxy, cab jaduhñ ñejpiä coø hajxy nyajcähxø'cämät. Jadúhñhöch cham tøø nmädia'agy nebiä Dios ja'a nni'x ja'a ngopc-hajtämhajxy xquiunú'xäm tu'ughamuum. Hoorä, jaduhñ mäwiin højtshájtäm, tu'ugmädia'agy hajxy nnimiøødhíjtäm coø Diosmädia'agy hajxy näguipxy nmäbójcäm, coø Jesucristo hajxy näguipxy nWiindsøn'hájtäm. Jaduhñä Dios hajxy xquiunú'xäm coø hermanodøjc hajxy nwiingudsähgøoyyämät, hoy hajxy jia xoñ jia häyoy. <sup>25</sup> Jaduhñä Dios quiumay coø hajxy nhíjtämät tu'ugjoot tu'ugcopc, coø hajxy nničhojc coø hajxy nnimié'e'xämät hamiñ haxøpy. <sup>26</sup> Coø tu'jäya'ay chaačhpógät, mänit hajxy nägøxiä njootmayhájtämät. Jaaná jaduhñduhmbä, coø tu'jäya'ay wyiingudsähgø'øwóøjät, mänit hajxy nägøxiä nxoondáacämät.

<sup>27</sup> Nwiindsøn'hájtämä Jesucristo hajxy nägøxiä pøn-jatiä Diosmädia'agy mäbøjp. Hawiingatiä Dios hajxy tøø xquiunú'xäm. <sup>28</sup> Näje'e hermanohajxy tøø tiu-ungmø'oyii ja'a Diósäm. Ja'a Dios quiuguexyhájtäbä, je'e hajxy jayøjp tuungpäat. Mänit hajxy je'e tiuun-

paatpä, ja'a Diosmädia'agy-yajwa'xpähajxy, mөөдä Diosmädia'agy-yajwiinhixөөbiähajxy. Näje'e hermanohajxy hoy-yagjuөөнä tiuñ ja'a Diosmäjaagөxpä. Näje'e hermanohajxy yajmөcpөcy ja'a jäya'ayhajxy nähba'amguhba'ambä. Näje'e hermanohajxy miäbuhbety. Näje'e hajxy jaduhñ miägapxy yhane'emy. Näje'e hajxy pi-aadyii coo wiinghayuucjaty hajxy quiäpxät. <sup>29</sup> Hoorä, cabä Dios hajxy nägөxiä xquiuguexyhajtäm. Cabä Diosmädia'agy hajxy nägөxiä nyajwä'xäm. Cab hajxy nägөxiä nyajnähixөyyäm. Cab hajxy nägөxiä ndúunäm hoy-yagjuөөнä ja'a Diosmäjaagөxpä. <sup>30</sup> Cab hajxy nägөxiä nba'amyajnáxäm. Cab hajxy nägөxiä tөө xpiáatäm coo ngápxämät wiinghayuucjaty. Y cab hajxy nägөxiä tөө xpiáatäm coo hajxy ngäpxhoyөyyämät waambatiä hermano tөө quiapxy wiinghayuucjaty. <sup>31</sup> Tsөгä njoot hajxy pädáacäm hamuumdu'joot coo Dios tuuñg hajxy ween xmiөyyäm ja'a maas tsoobaatpä. Chámhөchä mädia'agy hajxy nyajnähixө'өwa'añ nebiä Dios miädia'agy hajxy hoy mmaas yajtu'uyö'oyät.

## 13

<sup>1</sup> Coo nmädөjc hajxy nga'a tsojc nga'a mée'xämät, cabä Diosmädia'agy hajxy hänajty hoy ngudiúunäm, hoy hajxy cu nja capx cu nja mädiáacäm madiu'u nebiä jäya'ayhajxy yaa jia capxiän hädaa yaabä naaxwiin, nebiä Diosmoonsähajxy jim jia capxiän tsajpootyp. <sup>2</sup> Coo nmädөjc hajxy nga'a tsojc nga'a mée'xämät, cab hajxy nnä'ägädä tsoobáatämät, hoy hajxy cu nja najuөyyäm tii jadáanäp tii tunáanäp, hoy hajxy cөxiä wiinä cu nja najuөyy cu nja jahmiéjtsäm, hoyyä mөcmäjaa hajxy cu nja jaanч tehñ miөөdhajtäm hoy ñä'ä tiigөxpä. <sup>3</sup> Coo nmädөjc hajxy nga'a tsojc nga'a mée'xämät, cab hajxy nnä'ägädä tsoobáatämät, hoyyä häyoobäjäya'ay hajxy cөxiä wiinä

cu nja móoyäm mäduhñtiä hajxy nmøødhájtäm, hoyyá jäya'ay hajxy cu nja nähho'túutäm.

<sup>4</sup> Pønä miädøjc tsojp mee'xp, mee'xxieemy hajxy jaduñ yhity. Hoy hajxy jaduñ miädøjc-haty. Cabä hadsocywyiinmahñdy hajxy miøødä. Cab hajxy yajcumaya'añ. <sup>5</sup> Pønä miädøjc tsojp mee'xp, cab hajxy chähdiuhñdägoyyá. Cab hajxy wyiinducä. Cab hajxy jiootma'ady, hoy hajxy cøxpänejpiä cu jia tunøø. <sup>6</sup> Cabä haxøøgpä hajxy chocy; ja'a tøyhajtpä hajxy jaduñ chojpy. <sup>7</sup> Pønä miädøjc tsojp mee'xp, miee'xtujpy hajxy. Coö hajxy cøxpänejpiä tiunøøjät ja'a miädøjcäm, cab hajxy jiootma'ady. Cab hajxy ñäxø'øwø'øy, cab hajxy ñähøønø'øy. Hoy hajxy miäxi'igy, hoy hajxy miägapxy, weenä craa ja'a tøø quiädiéyábä jaduñ yhuuc wiinmahñmech coö jaduñ tøø quiädieey.

<sup>8</sup> Habaadaamb jaduñ coö jäya'ayä Diosmädia'agy hajxy hänäjty quia'a yajwa'xaannä. Habaadaamb jaduñ coö jäya'ayhajxy hänäjty quia'a capx quia'a mädia'agaannä wiinghayuucjaty. Habaadaamb jaduñ coö quia'a tsoobaadaannä tijatiä jäya'ayhajxy yaa ñajuøøby hädaa yaabä naaxwiin. Pero cøjxta'axiøø hajxy nniçhoc nnimiee'xáanäm. <sup>9</sup> Cahnä hajxy hoy nwiinjuøøyyäm je'eguiøxpä coö hajxy yaa nhíjtämnä hädaa yaabä naaxwiin. Cahnä Diosmädia'agy hajxy hoy nhabøjcäm coö hajxy nyajwá'xämät. <sup>10</sup> Habaadaamb jaduñ coö Diosmädia'agy hajxy maas ca'xy nwiinjuø'øwáanäm, paady hänäjty pøn quia'a wäditaannä Diosmädia'agy-yajwa'xpä.

<sup>11</sup> Coö hajxy nmuutsc-hájtämnä, cahnä hajxy hänäjty nwiinmahñméjtsäm. Pero coö hajxy nmøjjøøyyänä, mänit hajxy nnajuøøyyänä. Tøø hajxy nwiinmahñméjtsänä; cab hajxy nwiinmahñdyhájtänä neby hajxy tøø



nmuutsc-hájtäm. <sup>12</sup> Jaduhñ mäwínäts je'e, coo hajxy yaa nhíjtäm hádaa yaabä naaxwiin, cahnä Diosmädia'agy hajxy hoy nwiinjuóøyyämñä. Cahnä Dios hajxy nhixyhájtäm. Pero coo hajxy jimñ nnøcxáañäm tsajpootyp, mänitä Dios hajxy nhixyhadaañäm neby hajxy je'e xyhixyhájtäm. Mänitä miädia'agy hajxy ca'xy nwiinjuó'øwáañäm. <sup>13</sup> Tägøøgtu'u ja'a Dios hajxy xyhanéhäm; coo miädia'agy hajxy nmäbøjcämät coo tiøyhajtä, chaads coo Jesucristo hajxy njøbhíjxämät coo yaa quiädaactägatsa'añ, chaads coo nmädøjc hajxy ndsojc nmée'xämät. Hádaa høxhaambä jaduhñ maas tsoobaadaamb coo nmädøjc hajxy ndsojc nmée'xämät.

## 14

<sup>1</sup> Naxy hajxy ndehmñ ñiçhojc ndehmñ ñimiée'xämät hoy miánaaja. Je'e maas tsoobaatp. Jaaná jaduhñ-duhmä, tsögä Dios hajxy nämáayyäm coo mäjaa hajxy ween xmióoyyäm coo tiuunñ hajxy jaduhñ ndúunämät. Je'e tsoobaatp coo hermano ja'a Diosmädia'agy hajxy yajwa'xy. <sup>2</sup> Näje'e hermanohajxy, coo hajxy hänajtý quiapxa'añ tsajtøgooty, cab hajxy howyiinjuøøñä miädia'agy. Hix, ja'a Dios hajxy jaduhñ miøødmädiaacypy, ca'a yhøjtshájtäm, je'eguiøxpä coo Dioshajtíä wyiinjuø'øy. Cab højts jaduhñ nnä'ägädä wiinjuóøyyäm. Najtsapxøøyyäp hajxy jaduhñ ja'a Diosh-espíritäm. Jagooyä Dios jaduhñ ñajuø'øy waambaty hajxy jaduhñ miädia'agy. <sup>3</sup> Pero coo Diosmädia'agy hajxy ngápxämät nebiä jäya'ayhajxy jaduhñ wyiinjuó'øwät, mänitä jäya'ay ja'a Diosmädia'agy hajxy hoy nyajwiin-gapxøøyyämät, hoy hajxy jaduhñ nmägapx nhané'emät, hoy hajxy jaduhñ ngapxmøcpøjcämät. <sup>4</sup> Pøñ Dioshajtíä nälä møødmädiaacp, je'e mäjaa nidiuhñ móoyyäp nebiä Diosmädia'agy maas hoy jiaac wiinjuø'øwät. Hix, cabä

jäya'ayhajxy jaduhñ wyiinjuø'øyy waambaty jaduhñ miä-dia'agy. Pero coo hermanodøjc ja'a Diosmädia'agy hajxy nyajwiingapxøøyyämät howyiwjuøøñä, mänit hajxy miä-jaamo'owøøjät nebiä Diosmädia'agy hajxy jaduhñ maas hoy jiaac wiinjuø'owät.

<sup>5</sup> Maas tsoobaatp jaduhñ coo Diosmädia'agy hajxy ngápxämät howyiwjuøøñä; jaduhñä hermanohajxy nägøxiä wyiinjuø'owät, ja'a hajxy mädoobä. Hoy hit jaduhñ coo Dioshajtiä hajxy nägøxiä mmøødmädiá'agät. Mänit mäböcy yhoyø'owät coo hajxy mgapxhoyø'owät, jaduhñä hermanohajxy nägøxiä wyiinjuø'owät.

<sup>6</sup> Hermanodøjc, coöchä Dioshajtiä nnä'ä møødmädiá'agät maa mijtsän, cab hajxy jaduhñ hoy mwiinjuø'owät. Pero mänit hajxy jaduhñ mwiinjuø'owät coöch mijtsä Diosmädia'agy hoy nyajwiinhixø'owät nebiátyhøchä Dios ja'a miädia'agy hänäjty xñajtsapxøøyyä.

<sup>7</sup> Høxtáhmädsä xuuxpädøjc-hajxy, coo hajxy hoy quia'a xú'uxät, nägoodä hajxy nøcxy ñä'ä yajxu'uxy ñä'ä yajpøgø'øyy, y cab hoy yajmädoy. <sup>8</sup> Jaanä jaduhñduhmbä maa jäya'ayhajxy chiptuñän, coo soldado ja'a corneta hoy quia'a yajxú'uxät, cabä jiamioødhajxy jaduhñ hoy chip-túnät. Nä'ä hiñybiäyø'øgg nø'ø maamybiäyø'øggäp hajxy jaduhñ. <sup>9</sup> Jaduhñ mäwíinäts højtshájtäm, coo Dioshajtiä hajxy nmøødmädiáacämät, cabä nmädia'agy hajxy jaduhñ nniwyiinjuøøyyämät hamiñ haxøpy. Xiøøbä hajxy jaduhñ nnä'ä capx nnä'ä mädiáacämät. <sup>10</sup> Madiu'u hayuuc hajxy yaa ngápxäm hädaa yaabä naaxwiin.

Hawiingaty hayuuc hajxy nniwyiinjuøøyyäm. <sup>11</sup> Y coo mädia'agy hajxy hamiñ haxøpy nga'a nniwyiinjuøøyyämät hawiingaty, cab hajxy jaduhñ hoy nnimioødmädiáacämät. <sup>12</sup> Jaduhñ mäwíinäts mijts, mjaanç tehñ miänaamb mijts jaduhñ coo Dioshespíritu hajxy xtiuungmó'owät. Y myujwá'anäp ja'a tuung hajxy mädyii

maas tsoobaatp. Jaduhñä hermanodøjc hajxy maas hoy myajwiingapxó'owät nebiä Diosmädia'agy hajxy jaduhñ maas hoy wyiinjuó'owät.

<sup>13</sup> Jaduhñds je'e, pøn jaduhñ howyiinjuøøñä ca'a capxp ca'a mädiaacp, weenä Dios jaduhñ ñäma'ay coo miä-jaamo'owøøjät nebiä miädia'agy quiapxhoyó'owät. <sup>14</sup> Coo Dios hajxy nba'yáaxämät ja'a hayuuc-haamby mädyii Dioshajtiä wyiinjuøøbiä, cab hajxy nwiinjuøøyyämät, hoy hajxy cu nja mädiáacäm wiinmahñdyhaam. Y cab hajxy jaduhñ nnä'ägädä wiinjuøøyyäm. <sup>15</sup> Jaduhñds je'e, tsøcxä Dios hajxy pa'yáaxäm juøhñdyhaam, pero howyiinjuøøñä. Tsøcxä Dioshöy hajxy hóowäm juøhñdyhaam, pero howyiinjuøøñä. <sup>16</sup> Coo Dios hajxy nnämäayyämät “Dioscujú'uyäp”, ja'a hayuuc-haamby mädyii Dioshajtiä wyiinjuøøby, cab hajxy hamdsoo nwiinjuøøyyämät. Y ja'a jäya'ayhajxy jii mädoobä, ni je'e hajxy jaduhñ quia'a wiinjuó'owät. Y cab hajxy hoy piamänä'anät “Dioscujú'uyäp.” <sup>17</sup> Hoyyä Dios hajxy yajxón cu nja nämäayyäm “Dioscujú'uyäp”, ja'a jäya'ayhajxy jii mädoobä, cab hajxy wyiinjuó'owät. Y cabä Diosmädia'agy hajxy jaduhñ jiaac wiinjuó'owät. <sup>18</sup> Høøch, nnämäabiøchä Dios “Dioscujú'uyäp” je'eguiøxpä cooçh pøn jaduhñ xquia'a najtspaadø'øy nébiøch hayuuc-haamby ngapxiän, ja'a Dioshajtiä wyiinjuøøbiä. <sup>19</sup> Pero maa hajxy nhamugóøyyämän tsajtøgooty Dioswiingudsähgøøbiä, tsoobaatp jaduhñ cooçh howyiinjuøøñä ngápxät, hoy jia weñtiä. Cab jaduhñ jiaty tsoobáadät cooçh hayuuc-haamby ngápxät ja'a Dioshajtiä wyiinjuøøbiä, hóyhøch yoñ cu nja capx. Hix, cooçh howyiinjuøøñä ngápxät, wyiinjuó'owäp ja'a hermanohajxy jaduhñ, jadúhñhøchä Diosmädia'agy hajxy hoy nya-jwiingapxó'owät.

<sup>20</sup> Hermanodøjc, tsøg hädaa mädia'agy hajxy hoy wiinjuøøyyäm nebiä mõjhäna'c-hajxy hoy

wyiinjuø'yän. Yø'ø pigäna'c-hajxy, cahnä hajxy wyiinmahñmechñä. Pero cahnä haxøøgpä hajxy yhixy yhabaadyñä. <sup>21</sup> Jaduhnä Diosmädia'agy jecy miänaañ: "Ja'a judíoshajxy, cábøçhä nmädia'agy hajxy xmiábøgaanä. Nguexáambiøçhä jäguembä jäya'ay jim maa judíoshajxiän. Mänit hajxy miøødmädia'aga'añii wiinghayuuc-haamby. Pero ni jadúhñhøçhä nmädia'agy hajxy xquia'a mábøgaanä, nømä Dios miäna'añ." <sup>22</sup> Ja'a jäya'ay ja'a Diosmädia'agy hajxy ca'a mábøjpä, je'eguiøxpä højts hayuuc-haamby ngápxäm, ja'a Dioshajtä wyiinjuøbiä, ca'a jie'eguiøxpä ja'a jäya'ayhajxy ja'a Diosmädia'agy mábøjpä. Coø hajxy naxy ngápxäm ja'a hayuuc-haamby mädyii Dioshajtä wyiinjuøby, jaduhnä Dios hijxtahñd xii yecy coø jäya'ay tsaächpä peenä hajxy piaada'añ, ja'a Diosmädia'agy hajxy ca'a mábøjpä. Pero coø Diosmädia'agy hajxy naxy ngápxäm howyiinjuøñä, jaduhnä Dios hijxtahñd xii yecy coø jäya'ay hoybä weenbä hajxy piaada'añ, ja'a Diosmädia'agy hajxy mábøjpä. <sup>23</sup> Hiç, coø hajxy nägøxiä ngápxämät ja'a hayuuc-haamby mädyii Dioshajtä wyiinjuøby maa hajxy hñajty nhamugóøyyämän tsajtøgooty Dioswiingudsähgøøbiä, y coø jäya'ayhajxy jim tiägó'øwät, ja'a Diosmädia'agy hajxy ca'a mábøjpä, jaduhñda'a hajxy miäná'anät cooc tyijy hajxy nguhñinäm. <sup>24-25</sup> Pero coø Diosmädia'agy hajxy nägøxiä ngápxämät howyiinjuøñä, mñitä jäya'ayhajxy wyiinjuø'øwät, ja'a hajxy ca'a mábøjpä. Mänit hajxy yhuuc tehñ wyiinmahñmédsät. Mänit hajxy hamdsooyä ññajuø'øwøjät coø hajxy hñajty hoy tøø quia'a jäya'ayhaty. Mänit hajxy jaduhñ jyijcädá'agät. Mñitä Dios hajxy yhuuc tehñ wyiingudsähgø'øwät. Mänit hajxy yhuuc tehñ miäná'anät coø Dios hajxy hñajty tøy xjiaanç tehñ miøødhíjtäm.

<sup>26</sup> Hermanodøjc, maa hajxy nhamugóoyyámän tsajtøgooty Dioswiingudsähgøøbiä, tsøg hajxy yajxon yagjåjtäm nägøxiä, jaduñä Diosmädia'agy hajxy maas hoy nmaas mabójcämät. Näje'e Dioshöy hajxy yhöwa'añ. Näje'e hajxy yajnähixø'øwa'añ. Näje'e hajxy miädia'aga'añ waambatiä Diosmädia'agy hajxy hånajty tøø ñajtsapxø'øyii ja'a Diósäm. Näje'e hermanohajxy quiapxa'añ hayuuc-haamby mädyii Dioshajtiä wyiinjuøøby. Y näje'e hermanohajxy quiapxhoyø'øwa'añ waambatiä hermanohajxy hånajty tøø quiapxy ja'a hayuuc-haamby ja'a Dioshajtiä wyiinjuøøbiä. <sup>27</sup> Coø hajxy mänaa ngápxämät ja'a hayuuc-haamby ja'a Dioshajtiä wyiinjuøøbiä maa hajxy hånajty nhamugóoyyámän tsajtøgooty Dioswiingudsähgøøbiä, nämetsyä nádägøøquiä hajxy ngápxämät hanidiuhmjaty. Mänitä hermano tuljäya'ay xquiapxhoyóoyyámät. <sup>28</sup> Pero pø cabä hermanohajxy jim näje'e jiaty capxhoyø'øw, mejor ween hajxy jim nga'a nä'ägädä cápxämät tsajtøgooty ja'a hayuuc-haamby mädyii Dioshajtiä wyiinjuøøby. Wiingtuum hajxy nøcxy nnä'ägädä cápxäm jaduñ hanidiuhmjaty. Xmiädóowämäp ja'a Dios hajxy jaduñ. <sup>29</sup> Jaaná jaduñduhmbä, coø hermanohajxy hånajty quiapxa'añ waambaty hajxy hånajty ñajtsapxø'øyii ja'a Diósäm, ween hajxy nämetsyä nádägøøquiä quiapxy. Y ja'a hermanohajxy jaac jilbä, mänit hajxy jaduñ miáná'anät pø tøø hajxy hoy miädoy, pø caj. <sup>30</sup> Y coø wiinghermano hånajty quiapxa'añ waambaty hånajty ñajtsapxø'øyii ja'a Diósäm, weenä hermano yhuuc hamoñ, ja'a hånajty capxpä. <sup>31</sup> Hanidiuhmjaty hajxy ngápxämät nägøxiä waambatiä Dios hajxy hånajty xñajtsapxóoyyäm. Jaduñ hajxy nägøxiä maas hoy nhabójcämät; jaduñ hajxy nägøxiä nniguiapxwíjjämät. <sup>32</sup> Hix, coø miiçh

# 1 Corintios 14:33-34 61 Corintios 14:39

hänajty mgapxa'añ waambaty miiçhä Dios hänajty xñajtsapxø'øwaanä, mänit mgápxät coo hänajty tøø xyhabaatä. <sup>33-34</sup> Jaduhñä Dios quiumay coo hajxy hanidiuhmjaty ngápxämät. Cab jaduhñ quiumay coo hajxy nägøxiä nxiicmujc nmädiaacmújcämät tsajtøgooty.

Cab jaduhñ yhooyä coo to'oxiøjc-hajxy jiiby quiápxät tsajtøgooty maa Dios hajxy hänajty nwiingudsähgøøyyämän. Cabä Dios jaduhñ miäna'añ coo hajxy jiiby quiápxät. Jaduhñä hermanohajxy nägøxiä quiuhdujthaty wiinduhmyhagajpt. Jaduhñä Diosmädia'agy miäna'añ coo to'oxiøjc-hajxy miädia'agymiäbøgät. <sup>35</sup> Hoçhähdiiuunnä jaduhñ coo to'oxiøjc-hajxy jiiby quiápxät tsajtøgooty. Pø cabä Diosmädia'agy hajxy hänajty tøø wyiinjuø'øy tsajtøgooty, jimä ñihyhap hajxy miäyajtøwät maa yhamdsoo tøgootyhajxiän.

<sup>36</sup> Jaduhñä hermanodøjc-hajxy nägøxiä miäna'añ wiinduhmyhagajpt coo to'oxiøjc-hajxy jiiby quia'a capx quia'a mädiá'agät tsajtøgooty nebiä Diosmädia'agy miäna'añ. Y mijts jim hijpä Corintos, jaduhñ mijts mbaguhdujthájpät. Caj mijts mhamdsoo cuhdujt myajtúnät. <sup>37</sup> Nébiøch cham ngujaay, Diosmädia'agy hädaaduhñ. Naxy hajxy jaduhñ mdehm miäbøgät, pønjaty jaduhñ niñänøømäp coo Dios hajxy ñajtsapxøøyyäxä, coo Dioshespíritu piuhbodyii. <sup>38</sup> Pønjaty hajxy jaduhñ ca'a mäbøgaamb, cabä Dios hajxy jaduhñ quiumaya'añii.

<sup>39</sup> Jaduhñds je'e, hermanodøjc, tsøgä Dios hajxy nämáayyäm coo hajxy tehngajnä ween xpiuhbéjtämät, coo miädia'agy hajxy xñajtsapxøøyyämät. Jaduhñä miädia'agy hajxy hoy nyajwá'xämät. Pøn jaduhñ capxaamb mädia'agaamb ja'a hayuuc-haamby ja'a Dioshajtiä wyiinjuøøbiä, ween hajxy jaduhñ quiapxy, ween hajxy jaduhñ

miädia'agy. <sup>40</sup> Pero tsögä Diosmädia'agy hajxy hoy yajxón yagjáltäm tsajtøgooty.

## 15

<sup>1-2</sup> Hermanodøjc, tsög hajxy jahmiejtstáacäm coo Jesucristo hajxy tøø xñähho'túutäm. Jadúhñhøch mijts tøø nyajwiingapxø'øy. Tøø hajxy jaduhñ nmäbójcäm. Coø hajxy tehngajnä nmäbójcämät hamuumdu'joot, mänit hajxy jim nnøcxämät Dioswiinduum. Pero coø hajxy jaduhñ nga'a mäbójcämät, cab hajxy jim nnä'ägädä nøcxämät.

<sup>3</sup> Jadúhñhøch mijts tøø nyajwiingapxø'øy nebiáty-høchä Dios tøø xñajtscapxøøyyä. Jaanč tehñ choobaatp hädaa Diosmädia'agy jaduhñ. Tøø Jesucristo hajxy xñähho'túutäm; jaduhñä nbojpä ngädieeyhajtäm hajxy tøø xyajnhwáatsäm. Jaduhñ jim myiñ cujaay maa Diosmädia'aguiän. <sup>4</sup> Coø Jesucristo hánajty tøø yho'ogy, mänit hoy ñaaxtägø'øy. Mänit hoy jiuypiojtägach cumaaxc. Jaduhñ jim myiñgombä cujaay maa Diosmädia'aguiän. <sup>5</sup> Mänitä Pedro ja'a Jesucristo hoy wyiinguhixø'øy. Mänitä Jesucristo hoy wyiinguhixøøyyägumbä ja'a jiamiøødhajxy, ja'a nämajmetspäjäya'ayhajxy. <sup>6</sup> Mänit hoy wyiinguhixøøyyägombä ja'a miägu'ughajpähajxy nämägooxmägo'xnaxiä. Näje'eyyä hajxy tøø yho'nä, caj ñamayyä. <sup>7</sup> Mänitä Jacobo ja'a Jesucristo jadähooc wyiinguhixøøguiombä. Mänitä Jesucristo hoy wyiinguhixøøyyägombä ja'a jiamiøødhajxy nägøxiä.

<sup>8</sup> Høøch, høxháamhøchä Jesucristo njaac tehñ yhijxy. Pero cábøch mähdiojc jaduhñ nnä'ägädä tsoobaady. <sup>9</sup> Cábøch cuhdujt møc nmøødä nej yø'ø Dioscugueypä cuhdujt hajxy møc jiaanč tehñ miøødän. Cábøch mähdiojc nhawiinmatsä coøch mähdiojc jaduhñ nniñänømóojät coøch Dios xquiuguexyhajpä. Hix, haxøøghøch hijty njäya'ayhaty. Nyajtsaačhpøjpiøchä

jäya'ayhajxy hijty, ja'a Diosmädia'agy hajxy hijty panøcxpä. <sup>10</sup> Pero coočhä Dios xjiaančh cuguexyhaty, páadyhøch jaduhñ xpiuhbety. Hóyhøch nduñ. Maas máyhøchhä Diosmädia'agy tøø nyajwa'xy ja'a nmädia'agyháamhøch que ja'a Dios quiuguexypähajxy tøø yajwa'xy, ja'a hajxy jaac jimhä. Ca'a yhøøch jaduhñ tøø nnä'ä piy ngopcóotyhøch; Dióshøchhä wiinmahñdy tøø xmio'oy. Jaduhñhøchhä Dios xpiuhbety ja'a miäjaahaam. <sup>11</sup> Pero cab jaduhñ ñejpiä pønjaty mijtsä Diosmädia'agy tøø xyajwiingapxø'oy, pø høøch, pø wiinghäna'c. Tu'ugmädia'agy højtsä Diosmädia'agy nyajwa'xy. Y tøø mijtsä Diosmädia'agy mmäbøcy.

<sup>12</sup> Jaduhñ højtsä mädia'agy nyajwa'xy coo Jesucristo jiuypjøjtägajch coo hänäjty tøø yho'ogy. Mayyä jäya'ayhajxy jaduhñ quia'a mäbøcy cooc tyijy ja'a ho'oguiäya'ayhajxy quia'a juypiøga'añ. Cabä tøyhajt hajxy jaduhñ ñä'ä møødä. <sup>13</sup> Pø cab häxøpy jaduhñ tiøyyä coo ho'ogu-äya'ayhajxy jiuypjøga'añ, cabä Jesucristo cu jiuypjøjcy. <sup>14</sup> Y coo Jesucristo häxøpy tøø quia'a juypiøcy, cajxä hädaa mädia'agy häxøpy choobaady neby højts jaduhñ nja yajwa'xy. Y nej mijtsä mädia'agy hajxy mja mäbøcy, ni je'e häxøpy quia'a tsoobaady. <sup>15</sup> Jaduhñ højtsä Diosmädia'agy nyajwa'xy coo Dios ja'a Jesucristo yagjuypjøjcy. Pø cab häxøpy jaduhñ tiøyyä, høhñdaacp højts häxøpy ja'a Dioscxpä. Hiç, pø cab häxøpy jaduhñ tiøyyä coo ho'ogu-äya'ayhajxy jiuypjøga'añ, cabä Dios ja'a Jesucristo cu yagjuypjøjcy. <sup>16</sup> Pø cab häxøpy jaduhñ tiøyyä coo ho'ogu-äya'ayhajxy jiuypjøga'añ, cabä Jesucristo cu jiuypjøjcy. <sup>17</sup> Y coo Jesucristo cu quia'a juypiøjcy, cabä mädia'agy häxøpy choobaady neby hajxy nmäbøjcam. Y cabä nbojpä ngädieeyhajxy häxøpy ñähwáatsäm. <sup>18</sup> Y tøø ho'ogu-äya'ayhajxy häxøpy yhäda'agy møjcu'uhaam, hoy hajxy cu jia mäbøc ja'a Jesucristo miädia'agy. <sup>19</sup> Coo Jesucristo



cu quia'a jujyypiojcy, cab hajxy häxøpy jim nnøcxáanäm tsajpootyp. Tøø hajxy häxøpy nniwyinhøhñäm hamiñ haxøpy. Hoñäxuu'tsnä jäya'ay hajxy häxøpy xyhíjxám.

<sup>20</sup> Pero tøyhajt jaduhñ coo Jesucristo jiujyypiojtägajch. Jayøjp je'e jiujyypiojtsohñ. Høxhaam hajxy njaac jujypiojáanäm. <sup>21</sup> Tu'jäya'ay jecy yho'tsohñ hädaa yaabä naaxwiin, ja'a craa Adánhájtäbä. Paadiä Adán jecy yho'cy, coo Dios ja'a miädia'agy quia'a cudiuunä. Y jaanä jaduhñduhmbä, tu'jäya'ay jiujyypiojtsohñ; ja'a Jesucristo je'e. <sup>22</sup> Ja'a Adán, højts nhaphajt ndeedyhájtäm je'e, paady hajxy nägøxiä nbaho'ogáanäm. Y jaanä jaduhñduhmbä, nägøxiä hajxy njujyypiojáanämbä, pønjetiä Jesucristo miädia'agy mäböjçäp. <sup>23</sup> Coo Jesucristo hánajty tøø jiujyypiojtägach, mänit jim ñócxcombä maa Tieediän. Coo jim quioo'ty, mänit tiägøøyy hanehmbä. Y coo yaa quiädaac-tägátsät hädaa yaabä naaxwiin, mänitä ho'oguiäya'ayhajxy jiujyypiojtägatsa'añ, ja'a Jesucristo miädia'agy hajxy hánajty tøø miäböjçäbä. <sup>24-26</sup> Mänitä Jesucristo miäjäda'aga'añ. Mänitä Dios ja'a miädsip ja'a quihdujthajxy piogáanäxä nägøxiä. Mänitä jäya'ayhajxy quia'a ho'ogaanä ni mänaa. Mänitä Jesucristo ja'a Dios cuhdujt yajcø'ødägø'øwa'añ neby jäda'ahaty yhane'emiän. Mänitä naaxwiimbä wyiimbidaanä: <sup>27</sup> "Tøø Dios ja'a Jesucristo cuhdujt mio'oy coo jäya'ay cøxiä yhané'emät." Nømä Diosmädia'agy jecy miänaañ. Mänit jaduhñ tiøjiajty mänaa Jesucristo tiägø'øyän jäya'ayhanehmbä. Pero cabä Diosmädia'agy jecy miänaañ coo Dios yaghane'emy. Hix, jaaya'ayä cuhdujt yejc coo Jesucristo jäya'ay cøxiä yhané'emät. <sup>28</sup> Coo Jesucristo ja'a miädsip hánajty tøø quia'a cøxy yajmäjäda'agy, mänitä Tieedy cuhdujt quiøxy yajcø'ødägø'øwa'añ mäduhñtiä cuhdujt hánajty tøø mio'oyii. Jaduhñä Jesucristo yhane'ema'añii ja'a Tiéediäm. Jaduhñä Dios cøxiä yhane'ema'añ.

<sup>29</sup> Năje'e jäya'ayhajxy ñăbety ho'oguiäya'aguiøxpă. Pø cab hăxøpy jaduĥn tiøyyă coo ho'oguiäya'ayhajxy jiu-jypiøga'añ, tiiguiøxpă jäya'ayhajxy jaduĥn coo ñăbety ho'oguiäya'aguiøxpă.

<sup>30</sup> Nmăbøjpy højts jaduĥn coo hajxy njujypiøgáanăm, paady højts nga'a møjpada'agy, hoy højts nja wädity măjahñdium homiánaajă. <sup>31</sup> Cooĥ nmăna'añ cooĥ jaduĥn nwädity măjahñdium, je'eĥ jaduĥn nnănøømby cooĥă ca'awiindøyhăna'c-hajxy xjia wi'i yagho'oga'añ homiánaajă. Hermanodøjc, tehĥn tiøyhajt jaduĥn cooĥ nxoonďa'agy mijtscoøxpă, je'eguiøxpă coo Jesucristo miădia'agy hajxy mmăbøjcă, ja'a hajxy nWiindsønhăjtămbă. Hooră, jaană tøyhajt je'eduhmbă cooĥ nwädity măjahñdium homiánaajă. <sup>32</sup> Tøøĥă ca'awiindøyhăna'c-hajxy mayhooc xjia wi'i yagho'oga'añ yaa Efeso ja'a Diosmădia'agyquiøxpă. Cooĥ hăxøpy nga'a măbøcy coo ho'oguiäya'ayhajxy jiujypiøga'añ, cábøĥă Diosmădia'agy hăxøpy nyajwa'xy. Coo hăxøpy jaduĥn quia'a tøygyă coo ho'oguiäya'ayhajxy jiujypiøga'añ, cu nmănăanăm hajxy jaduĥn: "Tsøg hajxy jaac cáyyăm, tsøg hajxy jaac húucăm, coo hajxy jaboom nho'ogáanăm."

<sup>33</sup> Cab hajxy myajwiinhøønăt. Cab hajxy mmøødwădi-jmúgăt ja'a hăna'c-hajxy mănaambă cooc tyijy ho'oguiäya'ayhajxy quia'a jujypiøga'añ coo hajxy jaduĥn xya-jtu'udăgóyyăt. <sup>34</sup> Najtshixø'øw yø'ø mhaxøøgcuhdujt hajxy. Hoy hajxy myohy, hoy hajxy mnăjxnăt. Năje'e yø'ø mjamiøødhajxy quia'a măbøcyñă ja'a Diosmădia'agy. Hoĥhăndiuunnă je'eduhĥn.

<sup>35</sup> Năje'e jäya'ayhajxy yajtøwa'añ: "Nebiă ho'oguiäya'ayhajxy jiujypiøga'añ. Tii ni'x tii copc hajxy miøød-hadaamby." <sup>36</sup> Hoy piønă jaduĥn ñajuø'øy. Coo mădyii tøømd mní'ibăt, hoy trigo, tsipcøxp jaduĥn piu'udy; pø

caj, cab jaduhñ ñä'ä muxy. <sup>37</sup> Y ja'a tøømd jaduhmbä, coo mní'ibät, wiing jaduhñ jiajnä coo miuxy. <sup>38</sup> Dios jaduhñ tøø wyiinmay nebiatiä tøømd jiädät. Wiingatiä tøømd quiunuu'xy. <sup>39</sup> Jaaná wiingatiä Dios ja'a nni'x ja'a ngopc-hajxy xquiunúu'xämbä. Y wiingatiä animal ñi'x quiopc-hajxy quiunúu'xäxäbä, møødä animal-hajxy ja'a tøødstuum tsänaabiä, møødä muuxyhajxy, møødä hacxhajxy. <sup>40</sup> Ja'a hajxy jim hijpä tsajtcøxp, wiing hajxy jaduhñ quiähxø'øgy. Cab hajxy jaduhñ quiähxø'øgy neby hajxy yaa quiähxø'øguiän, ja'a hajxy yaa hijpä hädaa yaabä naaxwiin. <sup>41</sup> Haagä hajajp ja'a xøø møødä po'o møødä madsa'a, pero haagä wiingaty yhajajy. Jaaná jaduhñ ja'a madsa'abä, haagä wiingaty yhajajpä. <sup>42-44</sup> Jaduhñ mäwíinäts højtshájtäm, coo hajxy nho'c coo hajxy ndägóoyyäm, cabä mäjaa hajxy nmøød-hájtänä. Mänit hajxy nøcxy nnaaxtägøoyyänä. Ja'a naaxni'x ja'a naaxcopc jaduhñ naaxtägøøby. Mänit hajxy ngøxy yajxee'xtúutänä jutjooty. Mänit hajxy njájtänä hoxiøøghajnä. Pero coo Jesucristo yaa quiädaactägat-sáangombä hädaa yaabä naaxwiin, mänit hajxy njujyp-iøjtägatsáanägombä, coo hajxy hánajty tøø nho'c coo hajxy hánajty tøø ndägóoyyäm. Wiing hajxy jaduhñ njadáanänä coo hajxy jim nnøcxáanänä Dioswiinduum. Hoy yajxón hajxy hánajty njadáanäm haagä mäjaamøød. Y cab hajxy hánajty mänaa nho'tägatsáanänä. Wiing hajxy yaa nhíjtäm hädaa yaabä naaxwiin; wiing hajxy hánajty jim nhidáanänä Dioswiinduum.

<sup>45</sup> Jaduhñä Diosmädia'agy miäna'añ: “Coo Adán jaduhñ quiunuu'xtsohnä, mänitä jugyhajt miooyyä.” Pero coo Jesucristo jiuujyp-iøjtägajch, paadiä tøyhajt hajxy nmøød-hájtäm coo hajxy nbajuujyp-iøjtägatsáanämbä. <sup>46</sup> Jawyiin hajxy yaa nhíjtäm hädaa yaabä naaxwiin. Coo hajxy njujyp-iøjtägatsáanäm, mänit hajxy jim nnøcxáanäm

Dioswiinduum. <sup>47-49</sup> Ja'a craa Adánhájtabä, jecy je'eduhñ quiunuu'xtsohnä naaxoc-haam. Yaa jaduñ jecy chánaabiä hädaa yaabä naaxwiin. Jaanä jaduñ højt-shájtämbä, naaxoc hajxy nni'xhájtam ngopc-hájtam nebiä Adángän. Hix, je'e højts nhaphajt ndeedyhájtam. Haa ja'a Jesucristo, jim je'eduhñ chohñ tsajpootyp. Coó yaa quiädaactägatsa'añ hädaa yaabä naaxwiin, mänit hajxy njujypiögáanäm, pønjatiä miädia'agy hánajty tøø miäböjcä. Jaduñ hajxy jim nhidáanäm tsajpootyp nebiä Jesucristo jim yhitiän.

<sup>50</sup> Hermanodøjc, huuc mädown hajxy, cab hajxy jim hoy nnócxämät Dioswiinduum ni'xcopcmøød nebiä nni'xä ngopc hajxy yaa nmøødhájtam hädaa yaabä naaxwiin, je'eguiøxpä coo hajxy nho'og coo hajxy ndägoyyáanäm. Coó hajxy ndägájtsämät nebiä Jesucristo yhitiän, mänit mäböcy hajxy jim nnócxämät tsajpootyp. <sup>51</sup> Huuc mädown hajxy nébiøchä Dios jaduñ xñajtsapxøyyä. Coó Jesucristo quiädaactägatsa'añ, cahnä hajxy hánajty nägøxiä nho'c ndägóoyyäm. Näje'e hajxy hánajty njújquiämnä. Pero nägøxiä hajxy ndägatsáanäm, møødä jujcypiä møødä ho'ogypiä. <sup>52</sup> Nägooyyä Diosmoonsä ja'a corneta hánajty høxhaam jiaac yajxuuxmaya'añ, ja'a tsajpootypä, mänitä ho'oguiäya'ayhajxy jiuujpíøjtägatsa'añ. Cab hajxy hánajty mänaa yho'tägatsaanä. Mänitä hajxy nägøxiä ndägatsáanäm, møød hajxy hánajty yaabä jujcypiä, møød hajxy hánajty tøø yho'oguiäbä. <sup>53</sup> Hädaa naaxni'x hajxy nmøødhájtämbä, nä'ägädä ho'og nä'ägädä tägoyyáanäm hajxy jaduñ. Tsipcøxp hädaa nni'x hädaa ngopc-hajxy tiägatsáanäm, mänit hajxy jim nnócxáanäm Dioswiinduum. Y cab hajxy hánajty nho'tägatsáanänä ni mänaa. <sup>54</sup> Y coo hajxy jaduñ njadáanäm, mänitä Diosmädia'agy tiøjiada'añ coo jaduñ miäna'añ: “Cabä jäya'ayhajxy hánajty mänaa yho'og tiägoyyaanä.” Coó Jesu-

cristo hajxy tøø xñähho'túutäm, paady hajxy jiiby nga'a häda'agáañäm møjcu'uhaam. <sup>55</sup> Y coo hajxy jiiby nga'a häda'agáañäm, paady hajxy nga'a tsähgøøyyänä coo hajxy hñajty nho'ogáañäm. <sup>56</sup> Hoorä, coo Diosmädia'agy hajxy hoy nga'a cudiúunäm, paady hajxy ngädiéhyyäm, paady hajxy nhó'cäm. <sup>57</sup> Tsögä Dios hajxy nämáayyäm “Dioscujú'uyäp”, je'eguiøxpä coo Jesucristo hajxy xñähho'túutäm, ja'a hajxy nWiindsønhájtämbä. Coo hajxy xñähho'túutäm, paady hajxy jiiby nga'a häda'agáañäm møjcu'uhaam.

<sup>58</sup> Jaduhñds je'e, hermanodøjc, tsög hajxy hoy túunäm hamuumdu'joot ja'a Dioscøxpä. Cabä miädia'agy hajxy mänaa nnajtshixøøyyämät, howyiaambatiä jäya'ay hajxy cu xjia nämáayyäm. Nnajuøøyyäm hajxy jaduhñ coo Dios hajxy xpiuhbedáañäm.

## 16

<sup>1</sup> Mguexaambiä xädø'øñ hajxy jim Judeanaaxooty maa hermanodøjc-hajxiän. Jaduhñ hajxy myajmújpät nébiøçhä hermanodøjc-hajxy nhanehmy jim Galacianaaxooty. <sup>2</sup> Näxøøbaadiä xädø'øñ hajxy mbuhgónät mäduhñtiä hajxy hñajty tøø mguduñ. Hawiing hajxy jaduhñ myaghídät. Mänítøch hajxy xmió'owät cooçh jim nmédsät maa mijtsän neby hajxy jaduhñ mänit møc hadø'øçhä mga'a wädijtá'agät. <sup>3</sup> Mänitä hermano hajxy mwiimbíwät pønjátyhøçhä xädø'øñ hñajty nyajmäguexaamby jim Jerusalén maa hermanodøjc-hajxiän. Nocymiøød hajxy ñócxät nebiä hermanohajxy jim ñajuø'øwät cooçh hñajty tøø nguexy. <sup>4</sup> Pø hahixøøby hñajty cooçh jim nnócxät, mänitøch hajxy xpianócxät.

<sup>5</sup> Cooçh hñajty jim nnøcxa'añ Corintos, tu'unaxáambøch jim Macedonia. <sup>6-7</sup> Coo Dios jaduhñ

miäná'anät, jégäbøch jim maa mijtsän. Wéhndøch jim nga'a tsoj wiimbídät høxtä coo tøøchpoj hänäjty tøø ñaxy. Jadúhnhøch mijts jejcy nguhíxät. Jadúhnhøch hajxy xpiuhbédät majátyhøch hänäjty njaac wädita'añ. <sup>8</sup> Pero cábøch yaa ndsoj tu'ubøga'añ yaa Efeso. Coo Pentecostésxøø hänäjty tøø yhabaady, mänítøch ndu'ubøga'añ. <sup>9</sup> Hix, jaančh tehñ miäbøgaambä jäya'ayhajxy yaa, hóyhøch nmädsiphajxy jia nämayyá.

<sup>10</sup> Coo Timoteo jim miédsät maa mijtsän, hoy yajxon hajxy myajmédsät. Hix, jaduhñä Diostuung tiuumbä nébiøch nduñän. <sup>11</sup> Cab hajxy jaduhñ mbéxät. Mbuhbédäp hajxy jaduhñ nebiaduhñ jootcuyc jiaac mínät yaa maačh høøchän. Nja wi'i jibhijxyp højts yaa møødä hermanodøjc-hajxy.

<sup>12</sup> Y ja'a hermano Apolos, nja mänuu'xtáac-høch je'e coo hermanodøjc cu miøødnøcxy maa mijtsän, pero cab jäda'a tiehñ ñøcxa'añ. Cooc ñäbaadø'øwáanäxä, mänít-näc hänäjty ñøcxa'añ.

<sup>13</sup> Mniyajcopcø'øwøøjäp hajxy. Hoyyä Diosmädia'agy hajxy myajtu'uyó'oyät. Cab hajxy pøn mdsähgø'øwät. Mmee'xtúgäp hajxy. <sup>14</sup> Mničhoc mnimiee'xøøjäp hajxy hamuumdu'joot.

<sup>15</sup> Hermanodøjc, mnajuøøby hajxy coo Estéfanas ja'a Diosmädia'agy hajxy jayøjp miäbøjtsohñ jim Acayanaaxooty, møødä yhuung møødä tio'oxy. Jimä hermanodøjc hajxy piuhbety. <sup>16</sup> Jadúhnhøchä njoot chocy coo hajxy mbahix mbadúnät nebiä Estéfanashajxy tiuñän. <sup>17</sup> Xoondáacpøch jaduhñ coo Estéfanashajxy tøø miech møødä Fortunato møødä Acaico. Nñäjootmayhájpjøch mijts coo hajxy mjäguemä. Pero coo Estéfanashajxy tøø miech, paady cábøch njootmayhajnä. <sup>18</sup> Tøøchä njoot hajxy xyajmøcpøjcä. Jadúhnhøchä mjoothajxy nya-

jmøcpøgáanäbä. Mnajuó'øwäp hajxy jaduhñ coo Estéfanashajxy hoy tiuñ.

<sup>19</sup> Mijtsä hermanodøjc-hajxy xyajpoo'xp ja'a hajxy jim tsänaabiä Asianaaxooty. Xyajpoo'xp mijtsä Aquilaha-jxypä ja'a Dioscøxpä, møødä Priscila, møødä hermanodøjc-hajxy jim hamugøøbiä Dioswiingudsähgøøbiä maa tiøjc-hajxiän. <sup>20</sup> Xyajpoo'xp mijtsä hermanodøjc-hajxy nägøxiä. Hoy yajxón hajxy mniyajpoo'xójøt.

<sup>21</sup> Nhamdsoo cø'øháamhøch hädaa nocy njahmiay, høøch Pablo.

<sup>22</sup> Pønä Jesucristo ca'a tsojp, ja'a hajxy nWiindsøn hájtämbä, ween haxøøgtuum ñøcxy. Wiindsøn, min hadø'øchä.

<sup>23</sup> Weenä Jesucristo hajxy xmio'oy ja'a hoyhajt ja'a weenhajt, ja'a hajxy nWiindsøn hájtämbä. <sup>24</sup> Ndsójpiøch mijts nägøxiä ja'a Jesucristocøxpä. Amén.

## **El Nuevo Testamento en mixe de Guichicovi** **New Testament in Mixe, Isthmus (MX:mir:Mixe, Isthmus)**

copyright © 1988 Wycliffe Bible Translators, Inc.

Language: Mixe, Isthmus

Translation by: Wycliffe Bible Translators, Inc.

Mixe, Guichicovi [mir], Mexico

### **Copyright Information**

© 1988, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Mixe, Isthmus

**© 1988, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---



